

明史本紀

乾隆四十二年補纂

清乾隆四十二年補纂

明史本紀二十甲卷

吳瀛



明史卷一

本紀第一

總教習總理事務經筵講官少保兼太子太保保和殿大學士兼管吏部戶部尚書事加六級張廷玉等奉

敕修

太祖一

太祖開天行道肇紀立極大聖至神仁文義武俊德成
功高皇帝諱元璋字國瑞姓朱氏先世家沛徙句容再
徙泗州父世珍始徙濠州之鍾離生四子太祖其季也
母陳氏方娠夢神授藥一丸置掌中有光吞之寤口餘
香氣及產紅光滿室自是夜數有光起鄰里望見驚以
爲火輒奔救至則無有比長姿貌雄傑奇骨貫頂志意

廓然人莫能測至正四年旱蝗大饑疫太祖時年十七
父母兄相繼歿貧不克葬里人劉繼祖與之地乃克葬
卽鳳陽陵也太祖孤無所依乃入皇覺寺爲僧逾月遊
食合肥道病二紫衣人與俱護視甚至病已失所在凡
歷光固汝潁諸州三年復還寺當是時元政不綱盜賊
四起劉福通奉韓山童假宋後起潁徐壽輝僭帝號起
斬李二彭大趙均用起徐衆各數萬並置將帥殺吏侵
畧郡縣而方國珍已先起海上他盜擁兵據地寇掠甚
衆天下大亂十二年春二月定遠人郭子興與其黨孫
德崖等起兵濠州元將徹爾布哈憚不敢攻而日俘良

民以邀賞太祖時年二十四謀避兵卜於神去留皆不吉乃曰得毋當舉大事乎卜之吉大喜遂以閏三月甲戌朔入濠見子興子興奇其狀貌留爲親兵戰輒勝遂妻以所撫馬公女卽高皇后也子興與德崖齟齬太祖屢調護之秋九月元兵復徐州李二走死彭大趙均用奔濠德崖等納之子興禮大而易均用均用怨之德崖遂與謀伺子興出執而械諸孫氏將殺之太祖方在淮北聞難馳至訴於彭大大怒呼兵以行太祖亦甲而擁盾發屋出子興破械使人負以歸遂免是冬元將賈魯圍濠太祖與子興力拒之十三年春賈魯死圍解太祖

收里中兵得七百人子興喜署爲鎮撫時彭趙所部暴橫子興弱太祖度無足與共事乃以兵屬他將獨與徐達湯和費聚等南畧定遠計降驢牌寨民兵三千與俱東夜襲元將張知院于橫澗山收其卒二萬道遇定遠人李善長與語大悅遂與俱攻滁州下之是年張士誠據高郵自稱誠王十四年冬十月元丞相托克托大敗士誠于高郵分兵圍六合太祖曰六合破滁且不免與耿再成軍瓦梁壘救之力戰衛老弱還滁元兵尋大至攻滁太祖設伏誘敗之然度元兵勢盛且再至乃還所獲馬遣父老具牛酒謝元將曰守城備他盜耳奈何舍

巨寇戮良民元兵引去城賴以完托克托旣破土誠軍
聲大振會中讒遽解兵柄江淮亂益熾十五年春正月
子興用太祖計遣張天佑等拔和州檄太祖總其軍太
祖慮諸將不相下秘其檄期旦日會廳事時席尚右諸
將先入皆踞右太祖故後至就左比視事剖決如流衆
瞠目不能發一語始稍稍屈議分工甃城期三日太祖
工竣諸將皆後於是始出檄南面坐曰奉命總諸公兵
今甃城皆後期如軍法何諸將皆惶恐謝乃搜軍中所
掠婦女縱還家民大悅元兵十萬攻和拒守三月食且
盡而太子圖卜斡樞密副使班珠爾瑪克民兵元帥陳

額森分屯新塘高望雞籠山以絕餉道太祖率衆破之
元兵皆走渡江三月郭子興卒時劉福通迎立韓山童
子林兒于亳州國號宋建元龍鳳檄子興子天敘爲都
元帥張天佑太祖爲左右副元帥太祖慨然曰大丈夫
寧能受制于人耶遂不受然念林兒勢盛可倚藉乃用
其年號以令軍中夏四月常遇春來歸五月太祖謀渡
江無舟會巢湖帥廖永安俞通海以水軍千艘來附太
祖大喜往撫其衆而元中丞曼濟哈雅扼銅城閘馬場
河諸隘巢湖舟師不得出忽大雨太祖喜曰天助我也
遂乘水漲從小港縱舟還因擊曼濟哈雅于峪溪口大

敗之遂定計渡江諸將請直趨集慶太祖曰取集慶必自采石始采石重鎮守必固牛渚前臨大江彼難爲備可必克也六月乙卯乘風引帆直達牛渚常遇春先登拔之采石兵亦潰緣江諸壘悉附諸將以和州饑爭取資糧謀歸太祖謂徐達曰渡江幸捷若舍而歸江東非吾有也乃悉斷舟纜放急流中謂諸將曰太平甚近當與公等取之遂乘勝拔太平執萬戶納克楚總管靳義赴水死太祖曰義士也禮葬之揭榜禁剽掠有卒違令斬以徇軍中肅然改路曰府置太平興國翼元帥府自領元帥事召陶安參幕府事李習爲知府時太平四面

皆元兵右丞阿勒哈中丞曼濟哈雅等嚴師截姑孰口
陳額森水軍帥康茂才以數萬衆攻城太祖遣徐達鄧
愈湯和逆戰別將潛出其後來擊之擒額森并降其衆
阿勒哈等引去秋九月郭天敘張天佑攻集慶額森叛
二人皆戰死於是子興部將盡歸太祖矣額森尋爲民
兵所殺從子兆先收其衆屯方山與曼濟哈雅犄角以
窺太平冬十二月壬子釋納克楚北歸十六年春二月
丙子大破曼濟哈雅于采石三月癸未進攻集慶擒兆
先降其衆三萬六千人皆疑懼不自保太祖擇驍健五
百人入衛解甲酣寢達旦衆心始安庚寅克集慶元御

史大夫福壽死之曼濟哈雅遁歸張士誠水軍帥康茂才苗軍帥尋朝佐海軍帥葉撒阿勒哈部將完都等率衆降太祖入城召官吏父老諭之曰元政瀆擾干戈蜂起我來爲民除亂耳其各安堵如故賢士吾禮用之舊政不便者除之吏毋貪暴殃吾民民乃大喜過望改集慶路爲應天府辟夏煜孫炎楊憲等十餘人葬御史大夫福壽以旌其忠當是時元將鼎鼎扼鎮江拜布哈楊仲英屯寧國青衣軍張明鑑據揚州巴爾斯布哈駐徽州舒穆魯伊遜守處州其弟和遜守婺州宋巴延布哈守衢州而池州已爲徐壽輝將所據張士誠自淮東陷

平江轉掠浙西太祖既定集慶慮士誠壽輝強江左浙
右諸郡爲所并於是遣徐達攻鎮江拔之鼎鼎戰死夏
六月鄧愈克廣德秋七月己卯諸將奉太祖爲吳國公
置江南行中書省自總省事置僚佐貽書張士誠士誠
不報引兵攻鎮江徐達敗之進圍常州不下九月戊寅
如鎮江謁孔子廟遣儒士告諭父老勸農桑尋還應天
十七年春二月耿炳文克長興三月徐達克常州夏四
月丁卯自將攻寧國取之拜布哈降六月趙繼祖克江
陰秋七月徐達克常熟胡大海克徽州巴爾斯布哈遁
冬十月常遇春克池州繆大亨克揚州張明鑑降十二

月己丑釋繫囚是年徐壽輝將明玉珍據重慶路十八年春二月乙亥以康茂才爲營田使三月己酉錄囚鄧愈克建德路夏四月徐壽輝將陳友諒遣趙普勝陷池州是月友諒據龍興路五月劉福通破汴梁迎韓林兒都之初福通遣將分道四出破山東寇秦晉掠幽薊其鋒甚銳然至輒屠戮太祖乘福通北驚次第畧定江表所過不殺收召才雋由是人心日附冬十二月胡大海攻婺州久不下太祖自將往擊之舒穆魯伊遜遣將率車師由松溪來援太祖曰道陘車戰適取敗耳命胡德濟迎戰于梅花門大破之婺州降執和遜先一日城中

人望見城西五色雲如車蓋以爲異及是乃知爲太祖
駐兵地入城發粟振貧民改州爲寧越府辟范祖幹葉
儀許元等十三人分直講經史戊子遣使招諭方國珍
十九年春正月乙巳太祖謀取浙東未下諸路戒諸將
曰克城以武戡亂以仁吾比入集慶秋毫無犯故一舉
而定每聞諸將得一城不妄殺輒喜不自勝夫師行如
火不戢將燎原爲將能以不殺爲武豈惟國家之利子
孫實愛其福庚申胡大海克諸暨是月命寧越知府王
宗顯立郡學三月甲午赦大逆以下丁巳方國珍以溫
台慶元來獻且遣其子關爲質厚賜遣之夏四月俞通

海等復池州時耿炳文守長興吳良守江陰湯和守常州皆數敗士誠兵太祖以故久留寧越徇浙東六月壬戌還應天秋八月元察罕特穆爾復汴梁福通以林兒退保安豐九月常遇春克衢州擒宋巴延布哈冬十月遣夏煜授方國珍行省平章國珍以疾辭十一月壬寅胡大海克處州舒穆魯伊遜遁時元守兵單弱且聞中原亂人心離散以故江左浙右諸郡兵至皆下遂西與友諒鄰二十年春二月元福建行省參政袁天祿以福寧降三月戊子徵劉基宋濂章溢葉琛至夏五月徐達常遇春敗陳友諒于池州閏月丙辰友諒陷太平守將

朱文遜院判花雲王鼎知府許瑗死之未幾友諒弑其
主徐壽輝自稱皇帝國號漢盡有江西湖廣地約士誠
合攻應天應天大震諸將議先復太平以牽之太祖曰
不可彼居上游舟師十倍于我猝難復也或請自將迎
擊太祖曰不可彼知我出以偏師綴我而全軍順流趨
金陵半日可達吾步騎亟還已窮日矣百里趨戰兵法
所忌非策也乃馳諭胡大海擣信州牽其後而令康茂
才以書給友諒速來當守江東木橋爲內應友諒果引
兵東於是命常遇春伏軍石灰山徐達軍南門外張德
勝舟師駐龍江關楊璟別以一軍守大勝港太祖親總

大軍廬龍山戒將士偃赤幟山之右曰寇至則舉偃黃
幟山之左曰幟舉則進軍皆頓首受命乙丑友諒軍薄
大勝港楊璟遏之不得前退以舟衝江東橋則已易鐵
石乃移趨龍灣遣萬人登岸樹柵勢甚銳衆欲前擊太
祖曰姑飽食當乘雨擊之時方晴衆莫能測已而雲驟
起雨大注赤幟舉士卒競前拔柵友諒軍來爭遂合戰
而雨適止乃發鼓舉黃幟常遇春伏發徐達等諸師大
集水陸合蹙之友諒軍不能支遂大敗友諒乘別舸走
遂復太平下安慶而大海亦克信州初太祖令茂才給
友諒李善長以爲疑太祖曰二寇合吾首尾受敵惟速

其來而先破之則士誠膽落矣已而士誠兵竟不出丁卯置儒學提舉司以宋濂爲提舉遣子標受經學六月耿再成敗舒穆魯伊遜于慶元伊遜戰死遣使祭之秋九月徐壽輝舊將歐普祥以袁州降冬十二月復遣夏煜以書諭國珍二十一年春三月甲申立鹽茶課己亥置寶源局三月丁丑改樞密院爲大都督府元將薛顯以泗州降戊寅國珍遣使來謝飾金玉馬鞍以獻却之曰今有事四方所需者人材所用者粟帛寶玩非所好也秋七月友諒將張定邊陷安慶八月遣使于元平章察罕特穆爾時察罕平山東降田豐軍聲大振故太祖

與通好會察罕方攻益都未下太祖乃自將舟師征陳友諒戊戌克安慶友諒將丁普郎傅友德迎降壬寅次湖口追敗友諒于江州克其城友諒奔武昌分徇南康建昌饒蘄黃廣濟皆下冬十一月己未克撫州二十二年春正月友諒江西行省丞相胡廷瑞以龍興降乙卯如龍興改爲洪都府謁孔子廟告諭父老除陳氏苛政罷諸軍需存恤貧無告者民大悅袁瑞臨江吉安相繼下二月還應天鄧愈留守洪都辛未降人蔣英殺金華守將胡大海郎中王愷死之英叛降張士誠處州降人李祐之聞變亦殺行樞密院判耿再成反都事孫炎知

府王道同元帥朱文剛死之三月癸亥降人祝宗康泰
反陷洪都鄧愈走應天知府葉琛都事萬思誠死之是
月明玉珍稱帝於重慶國號夏夏四月己卯邵榮復處
州甲午徐達復洪都五月丙午命朱文正趙德勝鄧愈
鎮洪都六月戊寅察罕以書來報留我使人不遣察罕
尋爲田豐所殺秋七月丙辰平章邵榮參政趙繼祖謀
逆伏誅冬十二月元遣尚書張昶航海至慶元授太祖
江西行省平章政事不受察罕子庫庫特穆爾致書歸
使者二十三年春正月丙寅遣汪河報之二月壬申命
將士屯田積穀是月友諒將張定邊陷饒州士誠將呂

珍破安豐殺劉福通三月辛丑太祖自將救安豐珍敗走以韓林兒歸滁州乃還應天夏四月壬戌友諒大舉兵圍洪都乙丑諸全守將謝再興叛附于士誠五月築禮賢館友諒分兵陷吉安叅將劉齊知府朱叔華死之陷臨江同知趙天麟死之陷無爲州知州董曾死之秋七月癸酉太祖自將救洪都癸未次湖口先伏兵涇江口及南湖背遏友諒歸路檄信州兵守武陽渡友諒聞太祖至解圍逆戰于鄱陽湖友諒兵號六十萬聯巨舟爲陣樓櫓高十餘丈綿亘數十里旌旂戈盾望之如山丁亥遇于康郎山太祖分軍十一隊以禦之戊子合戰

徐達擊其前鋒俞通海以火礮焚其舟數十殺傷略相
當友諒驍將張定邊直犯太祖舟膠于沙不得退危
甚常遇春從旁射中定邊通海復來援舟驟進水湧太
祖舟乃得脫己丑友諒悉巨艦出戰諸將舟小仰攻不
利有怖色太祖親麾之不前斬退縮者十餘人人皆殊
死戰會日晡大風起東北乃命敢死士操七舟實火藥
蘆葦中縱火焚友諒舟風烈火熾烟燄漲天湖水盡赤
友諒兵大亂諸將鼓噪乘之斬首二千餘級焚溺死者
無算友諒氣奪辛卯復戰友諒復大敗於是斂舟自守
不敢更戰壬辰太祖移軍扼左蠡友諒亦退保渚磯相

持三日其左右二金吾將軍皆降友諒勢益蹙忿甚盡
殺所獲將士而太祖則悉還所俘傷者傅以善藥且祭
其親戚諸將陣亡者八月壬戌友諒食盡趨南湖背爲
南湖軍所遏遂突湖口太祖邀之順流搏戰及於涇江
涇江軍復遮擊之友諒中流矢死張定邊以其子理奔
武昌九月還應天論功行賞先是太祖救安豐劉基諫
不聽至是謂基曰我不當有安豐之行使友諒乘虛直
擣應天大事去矣乃頓兵南昌不亡何待友諒亡天下
不難定也壬午自將征陳理是月張士誠自稱吳王冬
十月壬寅圍武昌分徇湖北諸路皆下十二月丙申還

應天常遇春留督諸軍二十四年春正月丙寅朔李善長等率羣臣勸進不允固請乃卽吳王位建百官以善長爲右相國徐達爲左相國常遇春俞通海爲平章政事諭之曰立國之初當先正紀綱元氏闇弱威福下移馴至于亂今宜鑒之立子標爲世子二月乙未復自將征武昌陳理降漢沔荆岳皆下三月乙丑還應天丁卯置起居注庚午罷諸翼元帥府置十七衛親軍指揮使司命中書省辟文武人材夏四月建祠祀死事丁普郎等于康郎山趙德勝等于南昌秋七月丁丑徐達克廬州戊寅常遇春徇江西八月戊戌復吉安遂圍贛州達

徇荆湘諸路九月甲申下江陵夷陵潭歸皆降冬十二月庚寅達克辰州遣別將下衡州二十五年春正月己巳徐達下寶慶湖湘平常遇春克贛州熊天瑞降遂趨南安招諭嶺南諸路下韶州南雄甲申如南昌執大都督朱文正以歸文正太祖從子在鎮驕淫恣虐被責慚懼謀叛附張士誠羣臣請寘之法太祖不忍加誅安置桐城二月己丑福建行省平章陳友定侵處州參軍胡深擊敗之遂下浦城丙午士誠將李伯昇攻諸全之新城李文忠大敗之夏四月庚寅常遇春徇襄漢諸路五月乙亥克安陸己卯下襄陽六月壬子朱亮祖胡深攻

建寧戰于城下深被執死之秋七月令從渡江士卒被
創發疾者養之死者贍其妻子九月丙辰建國子學冬
十月戊戌下令討張士誠是時士誠所據南至紹興北
有通泰高郵淮安濠泗又北至于濟寧乃命徐達常遇
春等先規取淮東閏月圍泰州克之十一月張士誠寇
宜興徐達擊敗之遂自宜興還攻高郵二十六年春正
月癸未士誠窺江陰太祖自將救之士誠遁康茂才追
敗之于浮子門太祖還應天二月明玉珍死子昇自立
三月丙申令中書嚴選舉徐達克高郵夏四月乙卯襲
破士誠將徐義水軍于淮安義遁梅思祖以城降濠徐

宿三州相繼下淮東平甲子如濠州省墓置守塚二十
家賜故人汪文劉英粟帛置酒召父老飲極歡曰吾去
鄉十有餘年艱難百戰乃得歸省墳墓與父老子弟復
相見今苦不得久留歡聚爲樂父老幸教子弟孝弟力
田毋遠賈濱淮郡縣尚苦寇掠父老善自愛令有司除
租賦皆頓首謝辛未徐達克安豐分兵敗庫庫特穆爾
于徐州夏五月壬午至自濠庚寅求遺書秋八月庚戌
改築應天城作新宮鍾山之陽辛亥命徐達爲大將軍
常遇春爲副將軍帥師二十萬討張士誠御戟門誓師
曰城下之日毋殺掠毋毀廬舍毋發邱壟士誠母葬平

江城外毋侵毀旣而召問達遇春用兵當何先遇春欲直擣平江太祖曰湖州張天驕杭州潘原明爲士誠臂指平江窮蹙兩人悉力赴援難以取勝不若先攻湖州使疲于奔命羽翼旣披平江勢孤立破矣甲戌敗張天驕于湖州士誠親率兵來援復敗之于皂林九月乙未李文忠攻杭州冬十月壬子遇春敗士誠兵于烏鎮十一月甲申張天驕降辛卯李文忠下餘杭潘原明降旁郡悉下癸卯圍平江十二月韓林兒卒以明年爲吳元年建廟社宮室祭告山川所司進宮殿圖命去雕琢奇麗者是歲元庫庫特穆爾與李思齊張良弼構怨屢相

攻擊朝命不行中原民益困二十七年春正月戊戌諭
中書省曰東南久罹兵革民生凋敝吾甚憫之且太平
應天諸郡吾渡江開創地供億煩勞久矣今比戶空虛
有司急催科重困吾民將何以堪其賜太平田租二年
應天鎮江寧國廣德各一年二月丁未傅友德敗庫庫
特穆爾將李二于徐州執之三月丁丑始設文武科取
士夏四月方國珍陰遣人通庫庫特穆爾及陳友定移
書責之五月己亥初置翰林院是月以旱減膳素食復
徐宿濠泗壽邳東海安東襄陽安陸及新附地田租三
年六月戊辰大雨羣臣請復膳太祖曰雖雨傷禾已多

其賜民今年田租癸酉命朝賀罷女樂秋七月丙子給
府州縣官之任費賜綺帛及其父母妻長子有差著爲
令己丑雷震宮門獸吻赦罪囚庚寅遣使責方國珍貢
糧八月癸丑園丘方丘社稷壇成九月甲戌太廟成朱
亮祖帥師討國珍戊寅詔曰先王之政罪不及孥自今
非大逆不道毋連坐辛巳徐達克平江執士誠吳地平
戊戌遣使致書于元主送其宗室紳寶大王等北還辛
丑論平吳功封李善長宣國公徐達信國公常遇春鄂
國公將士賜賚有差朱亮祖克台州癸卯新宮成冬十
月甲辰遣起居注吳琳魏觀以幣求遺賢于四方丙午

令百官禮儀尚左改李善長左相國徐達右相國辛亥
祀元臣余闕于安慶李黼于江州壬子置御史臺癸丑
命湯和爲征南將軍吳禎副之討國珍甲寅定律令戊
午正郊社太廟雅樂庚申召諸將議北征太祖曰山東
則王宣反側河南則庫庫特穆爾跋扈關隴則李思齊
張思道梟張猜忌元祚將亡中原塗炭今將北征拯生
民于水火何以決勝遇春對曰以我百戰之師敵彼久
逸之卒直擣元都破竹之勢也太祖曰元建國百年守
備必固懸軍深入餽餉不前援兵四集危道也吾欲先
取山東撤彼屏蔽移兵兩河破其藩籬拔潼關而守之

扼其戶檻天下形勢入我掌握然後進兵元都勢孤援
絕不戰自克鼓行而西雲中九原關隴可席卷也諸將
皆口善甲子以徐達爲征虜大將軍常遇春爲副將軍
帥師二十五萬由淮入河北取中原胡廷瑞爲征南將
軍何文輝爲副將軍取福建湖廣行省平章楊璟左丞
周德興參政張彬取廣西己巳朱亮祖克溫州十一月
辛巳湯和克慶元方國珍遁入海壬午徐達克沂州斬
王宣己丑以廖永忠爲征南副將軍自海道會和討國
珍乙未頒大統歷辛丑徐達克益都十二月甲辰頒律
令丁未方國珍降浙東平張興祖下東平兗東州縣相

繼降己酉徐達下濟南胡廷瑞下邵武癸丑李善長帥
百官勸進表三上乃許甲子告于上帝庚午湯和廖永
忠由海道克福州

忠由致道

自宜備數表三土以符甲午吉于生帝與十陽味慶
事行于西餘數不齊南陽以歸不殆是矣是李善月

明史卷二
本紀第一

總裁官總理事務經筵講官少保兼太子太保保和殿大學士兼管吏部戶部尚書事加謚廷玉等奉

敕修

太祖二

洪武元年春正月乙亥祀天地于南郊卽皇帝位定有天下之號曰明建元洪武追尊高祖考曰元皇帝廟號德祖曾祖考曰恒皇帝廟號懿祖祖考曰裕皇帝廟號熙祖皇考曰淳皇帝廟號仁祖妣皆皇后立妃馬氏爲皇后世子標爲皇太子以李善長徐達爲左右丞相諸功臣進爵有差丙子頒卽位詔于天下追封皇伯考以

下皆爲王辛巳以李善長徐達等兼東宮官甲申遣使
覈浙西田賦壬辰胡廷瑞克建寧庚子以鄧愈爲征戍
將軍略南陽以北州郡湯和克延平元平章陳友定死
之福建平是月天下府州縣官來朝諭曰天下始定民
財力俱困要在休養安息惟廉者能約已而利人勉之
二月壬寅定郊社宗廟禮冬至祀昊天上帝于圜丘夏
至祀皇地祗于方丘太廟以四孟月及歲除五享社稷
以春秋二仲月上戊日祭皆親祀癸卯命湯和提督海
運廖永忠爲征南將軍朱亮祖副之由海道取廣東丁
未以太牢祀先師孔子于國學戊申祀社稷壬子詔衣

冠如唐制癸丑常遇春克東昌山東平甲寅楊璟克寶
慶乙丑定役法三月辛未鑄洪武通寶錢詔儒臣修女
誠戒后妃母預政壬申周德興克全州丁酉鄧愈克南
陽己亥徐達徇汴梁左君弼降夏四月辛丑蘄州進竹
簞卻之命四方毋妄獻廖永忠師至廣州元守臣何真
降廣東平丁未裕享太廟戊申徐達常遇春大破元兵
于洛水北遂圍河南梁王阿掄降河南平丁巳楊璟克
永州甲子幸汴梁丙寅馮勝克潼關李思齊張思道遁
五月己卯廖永忠下梧州潯貴容鬱林諸州皆降辛卯
改汴梁路爲開封府六月庚子徐達朝行在甲辰海南

海北諸道降壬戌楊璟朱亮祖克靖江秋七月戊子廖
永忠下象州廣西平庚寅振恤中原貧民辛卯帝將還
應天諭達等曰中原之民久爲羣雄所苦流離相望故
命將北征拯民水火元祖宗功德在人其子孫罔恤民
隱天厭棄之君則有罪民復何辜前代革命之際肆行
屠戮違天虐民朕實不忍諸將克城毋肆焚掠妄殺人
元之宗戚咸俾保全庶幾上答天心下慰人望不恭命
者罰無赦丙申命馮勝留守開封閏月丁未帝至自開
封己酉徐達會諸將兵于臨清庚戌定軍禮壬子常遇
春克德州丙寅克通州元帝奔上都是月徵天下賢才

爲守令免吳江廣德太平寧國滁和被災田租八月已
已以應天爲南京開封爲北京庚午師入大都元監國
淮王特穆爾布哈死之元亡徐達封府庫圖籍守宮門
禁士卒侵暴遣將巡古北口諸隘壬申以京師火四方
水旱詔中書省集議便民事丁丑定六部官制御史中
丞劉基致仕己卯赦殊死以下將士從征者恤其家逋
逃許自首新克州郡毋妄殺輸賦道遠者官爲轉運災
荒以實聞免鎮江租稅避亂民復業者聽墾荒地復三
年衍聖公襲封及授曲阜知縣並如前代制有司以禮
聘致賢士學校毋事虛文平刑毋非時決囚除書籍田

器稅民間逋負免徵蒙古色目人有才能者許擢用鰥寡孤獨廢疾者存恤之民年七十以上一子復他利害當興革不在詔內者有司具以聞辛巳徐達平元都捷奏至羣臣表賀壬午幸北京改大都路曰北平府徵元故臣癸未詔徐達常遇春取山西甲午放元官人九月癸亥詔曰天下之治天下之賢共理之今賢士多隱巖穴豈有司失于敦勸歟朝廷疎于禮待歟抑朕寡昧不足致賢將在位者壅蔽使不上達歟不然賢士大夫幼學壯行豈甘沒世而已哉天下甫定朕願與諸儒講明治道有能輔朕濟民者有司禮遣乙丑常遇春下保定

遂下真定冬十月庚午馮勝湯和下懷慶澤潞相繼下
丁丑帝至自北京戊寅以元都平詔天下丁酉定朝會
宴饗儀十一月己亥遣使分行天下訪求賢才庚子始
祀上帝于圜丘辛丑建大本堂充以古今圖籍延儒臣
教授太子諸王甲辰以孔子五十六世孫希學襲封衍
聖公希大世襲曲阜知縣立孔顏孟三氏學癸亥定藉
田禮詔劉基還十二月丁卯徐達克太原庫庫特穆爾
走甘肅山西平己巳置登聞鼓壬申改宣徽院置光祿
司官改太史院置司天監尋又改爲欽天監甲戌馮勝
克平陽

二年春正月乙巳立功臣廟于雞籠山丁未享太廟戊申定太歲風雲雷雨及嶽瀆山川城隍之祀庚戌詔曰朕淮右布衣因天下亂率衆渡江保民圖治今十有五
年荷天眷祐悉皆戡定用是命將北征齊魯之民饋糧給軍不憚千里朕軫厥勞已免元年田租遭旱民未蘇其更賜一年頃者大軍平燕都下晉冀民被兵燹困征斂北平燕南河東山西今年田租亦與蠲免河南諸郡歸附久欲惠之西北未平師過其地是以未遑今晉冀平矣西抵潼關北界大河南至唐鄧光息今年稅糧悉除之又詔曰應天太平鎮江宣城廣德供億浩穰去歲

蠲免遇旱惠不及下其再免諸郡及無爲州今年租稅
庚申常遇春取大同是月倭寇山東濱海郡縣二月丙
寅朔詔修元史壬午耕藉田三月庚子徐達至奉元張
思道遁振陝西饑戶米三石丙午常遇春至鳳翔李思
齊奔臨洮夏四月丙寅遇春還師北平己巳命諸子受
經于博士孔克仁令功臣子弟入學乙亥編祖訓錄定
封建諸王國邑及官屬之制徐達下鞏昌丙子賜秦隴
新附州縣稅糧丁丑馮勝至臨洮李思齊降乙酉徐達
襲破元豫王于西寧五月甲午朔日有食之丁酉徐達
下平涼延安張良臣以慶陽降尋叛癸卯始祀地於方

丘六月己卯常遇春克開平元帝奔和林壬午封陳日
燧爲安南國王秋七月己亥鄂國公常遇春卒于軍詔
李文忠領其衆辛亥庫庫特穆爾遣將破原州涇州辛
酉馮勝擊走之丙辰明昇遣使來八月丙寅元兵攻大
同李文忠擊敗之己巳定內侍諸司官制諭吏部曰內
臣但備使令毋多人古來闡寺擅權可爲鑒戒馭之之
道當使畏法勿令有功有功則驕恣矣癸酉元史成丙
子封王顥爲高麗國王癸未徐達克慶陽斬張良臣陝
西平是月命儒臣纂禮書九月庚子製御寶辛丑召徐
達湯和還馮勝留總軍事癸卯以臨濠爲中都戊午征

南師還冬十月壬戌遣楊璟諭明昇甲戌甘露降于鍾山羣臣請告廟不許辛卯詔天下郡縣立學十一月乙巳祀上帝于園丘以仁祖配十二月甲戌封阿答阿者爲占城國王甲申振西安諸府饑戶米二石己丑大賚平定中原及征南將士庚寅庫庫特穆爾攻蘭州指揮于光死之是年占城安南高麗入貢

三年春正月癸巳命徐達爲征虜大將軍李文忠馮勝鄧愈湯和副之分道北征甲午定朝日夕月禮二月乙丑詔續修元史癸未追封郭子興滁陽王戊子詔求賢才可任六部者是月李文忠下興和進兵察罕淖爾執

元平章珠占三月庚寅免南畿河南山東北平浙東江
西廣信饒州今年田租夏四月乙丑封皇子棧爲秦王
橚晉王棣燕王懋吳王楨楚王樽齊王梓潭王杞趙王
檀魯王從孫守謙靖江王徐達大破庫庫特穆爾于沈
兒峪盡降其衆庫庫特穆爾走和林丙戌元帝殂于應
昌子阿裕錫哩達喇嗣是月慈利土官覃厘作亂五月
己丑徐達取興元分遣鄧愈招諭吐蕃丁酉詔守令舉
學識篤行之士己亥詔設科取士甲辰李文忠克應昌
元嗣君北走獲其子密迪哩巴拉降五萬餘人窮追至
北慶州不及而還丁未詔行大射禮戊申祀地于方丘

以仁祖配辛亥徐達下興元鄧愈克河州丁巳詔開國
時將帥無嗣者祿其家是月旱齋戒后妃親執爨皇太
子諸王饋于齋所六月戊午朔素服草履步禱山川壇
露宿凡三日還齋于西廡辛酉賚將士省獄囚命有司
訪求通經術明治道者壬戌大雨癸亥詔定嶽鎮海瀆
及郡邑城隍神號各從本稱其前代封號悉罷之壬申
李文忠捷奏至命仕元者勿賀諡元主曰順帝癸酉密
迪哩巴拉至京師羣臣請獻俘帝曰武王伐殷用之乎
省臣以唐太宗嘗行之對帝曰太宗是待王世充耳若
遇隋之子孫恐不爾也遂不許又以捷奏多侈辭謂宰

相曰元主中國百年朕與卿等父母皆賴其生養奈何
爲此浮薄之言亟改之乙亥封密迪哩巴拉爲崇禮侯
丙子告捷于南郊丁丑告太廟詔示天下辛巳立開中
鹽法從山西行省請召商輸米而與之鹽謂之開中其
後各行省多召商中鹽以實邊儲自五石至一石有差
徙蘇州松江嘉興湖州杭州民無業者田臨濠給資糧
牛種復三年是月倭寇山東浙江福建濱海州縣秋七
月丁亥續修元史成丙辰明昇將吳友仁寇漢中叅政
傅友德擊却之中書左丞楊憲專恣傾險太史令劉基
發其奸狀坐誅八月乙酉遣使瘞中原遺骸九月乙卯

定朝會宴饗樂舞之數是月禮書成名曰大明集禮刊
行天下冬十月癸亥命周德興爲征南將軍討覃屋屋
遁乙酉始作太廟圭瓚十一月壬辰北征師還甲午告
武成於郊廟丙申大封功臣進李善長韓國公徐達魏
國公封李文忠曹國公馮勝宋國公鄧愈衛國公常遇
春子茂鄭國公湯和等侯者二十八人已亥設壇親祭
戰沒將士庚戌有事于園丘辛亥詔戶部置戶籍戶帖
歲計登耗以聞著爲令乙卯封中書右丞汪廣洋忠勤
伯御史中丞劉基誠意伯十二月甲子建奉先殿定武
臣世襲之制庚午遣使祭歷代帝王陵寢並加修葺已

卯賜勳臣田壬午以正月至是月日中屢有黑子詔廷臣言得失是年占城瓜哇西洋入貢

四年春正月丙戌李善長罷以汪廣洋爲右丞相丁亥命中山侯湯和爲征西將軍江夏侯周德興德慶侯廖永忠副之率舟師由瞿塘潁川侯傅友德爲征虜前將軍濟寧侯顧時副之率步騎由秦隴伐蜀魏國公徐達練兵北平戊子命衛國公鄧愈督餉給征蜀軍庚寅建郊廟於中都丁酉享太廟始行裸禮丁未詔設科取士連舉三年嗣後三年一舉戊申免山西旱災田租庚戌定文武官歲祿二月己巳奉先殿成甲戌幸中都壬午

至自中都元平章劉益以遼東降是月蠲太平鎮江寧
國田租三月乙酉朔始策試天下貢士賜吳伯宗等進
士及第出身有差乙巳徙山後民萬七千戶屯北平丁
未誠意伯劉基致仕夏四月丙戌傅友德克階州文隆
綿三州相繼下五月免江西浙江秋糧六月壬午傅友
德克漢州辛卯廖永忠克夔州戊戌明昇將丁世貞破
文州守將朱顯忠死之癸卯湯和至重慶明昇降戊申
倭寇膠州是月徙山後民三萬五千戶于內地又徙沙
漠遺民三萬二千戶屯田北平秋七月辛亥徐達練兵
山西辛酉傅友德下成都四川平乙丑明昇至京師封

歸義侯八月甲午免中都淮揚及秦滁無爲田租己酉
振陝西饑是月高州海寇亂通判王名善死之九月庚
戌朔日有食之丁丑命州縣設糧長以田多者爲之冬
十月丙申征蜀師還十一月丙辰有事于園丘庚申命
官吏犯贓者罪勿貸是月免陝西河南被災田租十二
月徐達還是年安南淳泥高麗三佛齊暹羅日本真臘
入貢

五年春正月壬子置親王護衛指揮使司癸丑待制王
禕使雲南詔諭元梁王巴咱爾幹爾密禕至不屈死乙
丑徙陳理明昇于高麗戊申定武選法甲戌命魏國公

徐達爲征虜大將軍出雁門趨和林曹國公李文忠爲左副將軍出應昌宋國公馮勝爲征西將軍取甘肅征庫庫特穆爾靖海侯吳禎督海運餉遼東命衛國公鄧愈爲征南將軍江夏侯周德興江陰侯吳良副之分道討湖南廣西洞蠻二月丙戌安南陳叔明弑其主日燧自立遣使入貢却之三月戊申免京民役丁卯都督僉事藍玉敗庫庫于圖拉河夏四月己卯振濟南萊州饑戊戌始行鄉飲酒禮庚子鄧愈平散毛諸洞蠻五月壬子徐達及元兵戰于嶺北敗績是月詔曰天下大定禮儀風俗不可不正諸遭亂爲人奴隸者復爲民凍餒者

里中富室假貸之孤寡殘疾者官養之母失所鄉黨論
齒相見揖拜母違禮婚姻毋論財喪事稱家有無母惑
陰陽拘忌停柩暴露流民復業者各就丁力耕種母以
舊田爲限僧道齋醮雜男女恣飲食有司嚴治之閩粵
豪家毋闖人子爲火者犯者抵罪六月丙子定宦官禁
令丁丑定宮官女職之制戊寅馮勝克甘肅追敗元兵
于瓜沙州癸巳定六部職掌及歲終考績法壬寅吳良
平靖州蠻甲辰李文忠敗元兵于鄂爾坤河宣寧侯曹
良臣戰沒乙巳作鐵榜誠功臣是月振山東饑免被災
郡縣田租秋七月丙辰湯和及元兵戰于斷頭山敗績

八月丙申吳良平五開古州諸蠻甲辰元兵侵雲內州
同知黃里死之九月戊午周德興平婪鳳安田諸蠻冬
十月丁酉馮勝師還是月免應天太平鎮江寧國廣德
田租十一月辛酉有事于園丘甲子征南師還壬申納
克楚侵遼東是月召徐達李文忠還十二月甲戌詔以
農桑學校課有司辛巳命百官奏事啓皇太子庚戌命
鄧愈爲征西將軍征吐蕃是年瑣里占城高麗琉球烏
斯藏入貢高麗貢使再至諭自後三年一貢
六年春正月丁未選朝天宮道士供事郊壇甲寅謫汪
廣洋爲廣東參政二月戊子改羣牧監爲太僕寺乙未

諭暫罷科舉察舉賢才壬寅命御史及按察使考察有
司三月癸卯朔日有食之頒昭鑒錄訓誡諸王戊申大
閱王子命徐達爲征虜大將軍李文忠馮勝鄧愈湯和
副之備邊山西北平乙巳設六科增置給事中甲子命
指揮使於顯爲總兵官備倭夏四月己丑令有司上山
川險易圖祖訓錄成帝自爲序頒賜諸王六月壬辰庫
庫特穆爾遣兵攻雁門指揮吳均擊却之是月免北平
河間河南開封延安汾州被災田租秋七月壬寅命戶
部稽渡江以來各省水旱災傷分數優恤之壬子以胡
惟庸爲右丞相八月乙酉建歷代帝王廟于京師冬十

月辛巳召徐達馮勝還十一月壬子庫庫特穆爾侵大
同徐達遣將擊敗之達仍留鎮丁巳大輅成先是禮官
考五輅之制帝以玉輅過奢命作木輅飾以丹漆至是
成甲子遣兵部尚書劉仁振真定饑丙寅冬至帝不豫
改卜郊閏月乙亥錄故功臣子孫未嗣者二百九人壬
午有事于圜丘庚寅頒定大明律是年暹羅高麗占城
真臘三佛齊入貢命安南陳叔明權知國事
七年春正月甲戌命都督僉事王簡王誠平章李伯昇
屯田河南山東北平靖海侯吳禎爲總兵官都督於顯
副之巡海捕倭二月丁酉朔日有食之戊午命修曲阜

孔子廟堂祭器樂器蠲孔氏荒田租仍設孔顏孟三氏
教授訓其族人是月平陽太原汾州歷城汲縣旱蝗並
免租稅夏四月己亥都督藍玉敗元兵于白酒泉遂拔
興和壬寅金吾指揮陸齡討永道諸州蠻平之五月丙
寅日歷成丙子免真定等四十二府州縣被災田租辛
巳振蘇州饑民三十萬戶癸巳減蘇松嘉湖極重田租
之半六月陝西平涼延安靜寧鄜州雨雹山西山東北
平河南蝗並蠲田租秋七月甲子李文忠破元兵于大
寧高州壬申倭寇膠州官軍擊敗之壬午寇大任海口
百戶許彰追之戰死八月甲午朔祀歷代帝王廟丁酉

申定兵衛之制先是洪武元年自京師至郡縣皆置衛所至是申定其制辛丑詔軍士陣歿父母妻子不能自存者官爲存養百姓避兵離散或客死遺老幼並資遣還遠宦卒官妻子不能歸者有司給舟車資送乙卯增列侯及都督以下官祿庚申振河間廣平順德真定饑蠲租稅九月丁丑遣崇禮侯密迪哩巴拉歸冬十一月壬戌納克楚侵遼陽千戶吳壽擊走之辛未有事于圜丘十二月戊戌召鄧愈湯和還是年阿難功德國暹羅琉球三佛齊烏斯藏薩里輝和爾入貢

八年春正月辛未增祀雞籠山功臣廟一百八人癸酉

命有司察窮民無告者給屋舍衣食辛巳鄧愈湯和等
十三人屯戍北平陝西河南丁亥詔天下立社學是月
河決開封發民夫塞之二月甲午宥雜犯死罪以下及
官犯私罪者謫鳳陽輸作屯種贖罪癸丑耕藉田召徐
達李文忠馮勝還傅友德等留鎮北平三月辛酉立鈔
法辛巳罷寶源局鑄錢乙酉免驛夫田租夏四月辛卯
幸中都丁巳至自中都免彰德大名臨洮平涼河州被
災田租罷營中都致仕誠意伯劉基卒五月戊辰使中
官趙成市馬河州己巳命永嘉侯朱亮祖偕傅友德鎮
北平六月壬寅指揮同知胡汝平貴州蠻秋七月己未

朔日有食之辛酉改作太廟壬戌召傅友德朱亮祖還
命李文忠顧時鎮山西北平戊辰詔百官奔父母喪母
俟報京師地震丁丑免應天太平寧國鎮江及蘄黃諸
府被災田租八月己酉元庫庫特穆爾卒冬十月丁亥
詔舉富民素行端潔達時務者壬子命皇太子諸王講
武中都癸丑改各都衛爲都指揮使司乙卯定歲時朔
望祀陵寢禮十一月丁丑有事于圜丘十二月戊子京
師地震甲寅遣使振蘇州湖州嘉興松江常州太平寧
國杭州水災是月納克楚侵遼東指揮馬雲葉旺大敗
之是年薩里高麗占城暹羅日本瓜哇三佛齊入貢

九年春正月命中山侯湯和潁川侯傅友德都督僉事
藍玉王弼中書右丞丁玉備邊延安二月乙巳太白晝
見凡五日三月己卯詔曰比年西征燉煌北伐沙漠軍
需甲仗皆資山陝又以秦晉二府宮殿之役重困吾民
平定以來閭閻未息國都始建土木屢興畿輔旣極煩
勞外郡疲于轉運今蓄儲有餘其淮揚安徽池五府及
山西陝西河南福建江西浙江北平湖廣今年租賦悉
免之夏四月庚戌雨京師自去年八月不雨至是始雨
五月癸酉晴自庚戌雨至是始霽六月甲午改行中書
省爲承宣布政使司辛丑李文忠還秋七月癸丑朔日

有食之是月蠲蘇松嘉湖水災田租振永平旱災元將
巴顏特穆爾侵延安傅友德敗降之八月乙酉遣官省
歷代帝王陵寢禁芻牧置守陵戶忠臣烈士祠有司以
時葺治分遣國子生修嶽鎮海瀆祠西番多爾濟巴勒
寇罕東河州指揮甯正擊走之閏九月庚寅以災異詔
求直言癸巳定百官品秩汰中書省平章參知政事御
史臺侍御史殿中治書侍御史等官冬十月己未太廟
成自是行合享禮丙子命秦晉燕吳楚齊諸王治兵鳳
陽十一月壬午有事于園丘是月平遙訓導葉伯巨應
詔上言分封太侈用刑太繁求治太速帝怒其離間骨

肉下獄死戊子徙山西及真定民無產者田鳳陽十二月甲寅振畿內浙江湖北水災已卯送元臣蔡子英出塞子英被獲授官不受久之帝知其不可奪命有司送出塞歸和林遣都督同知沐英乘傳詣陝西問民疾苦是年覽邦琉球安南日本烏斯藏高麗入貢

十年春正月辛卯以羽林等衛軍益秦晉燕三府護衛是春振蘇松嘉湖水災夏四月己酉命鄧愈爲征西將軍沐英爲副將軍率師討吐蕃大破之是月振太平寧國及宜興錢塘諸縣水災五月庚子命韓國公李善長曹國公李文忠總中書省大都督府御史臺議軍國重

事癸卯振湖廣水災丙午戶部主事趙乾振荆蘄遲緩
誅六月丁巳詔臣民言事者實封達御前丙寅命政事
啓皇太子裁決奏聞秋七月甲申置通政司是月始遣
御史巡按州縣八月庚戌改建大祀殿于南郊太祖以
天地分祭於情弗安詔卽圜丘壇址建屋爲大祀殿每
歲春首合祀天地癸丑改建社稷壇午門右合祀社稷
選武臣子弟讀書國子監九月丙申振紹興金華衢州
水災辛丑以胡惟庸爲左丞相汪廣洋爲右丞相冬十
月丙午社稷壇成戊午封沐英西平侯辛酉賜百官公
田十一月癸未衛國公鄧愈卒丁亥合祀天地于奉先

明史卷二
殿是月免河南陝西廣東湖廣田租威茂蠻叛命御史大夫丁玉爲平羌將軍討平之十二月乙巳朔日有食之丁未錄故功臣子孫五百餘人授官有差是年占城三佛齊暹羅瓜哇真臘入貢高麗使五至以嗣王未立却之

十一年春正月甲戌封皇子椿爲蜀王柏湘王桂豫王模漢王植衛王改封吳王橚爲周王己卯進封湯和信國公是月徵天下布政使及知府來朝二月指揮胡淵平茂州蠻三月壬午命奏事毋關白中書省是月第來朝官爲三等夏四月元嗣君阿裕錫哩達喇殂子特古

斯特穆爾嗣五月丁酉存問蘇松嘉湖被水災民戶賜米一石蠲逋賦六十五萬有奇六月壬子遣使祭故元嗣君己巳五開蠻叛殺靖州指揮過興以辰州指揮楊仲名爲總兵官討之秋七月丁丑振平陽饑是月蘇松揚台海溢遣官存恤八月免應天太平鎮江寧國廣德諸府州秋糧九月丙申追封劉繼祖爲義惠侯冬十月甲子大祀殿成十一月庚午征西將軍西平侯沐英率都督藍玉王弼討西番是月五開蠻平是年暹羅闍婆高麗琉球占城三佛齊朶甘烏斯藏彭亨百花入貢十二年春正月己卯始合祀天地于南郊甲申洮州十

八族番叛命沐英移兵討之丙申丁玉平松州蠻二月
戊戌李文忠督理河岷臨鞏軍事乙巳詔曰今春雨雪
經旬天下貧民困于飢寒者多有其令有司給以鈔丙
寅信國公湯和率列侯練兵臨清夏五月癸未蠲北平
田租六月丁卯都督馬雲征大寧秋七月丙辰丁玉回
師討眉縣賊平之己未李文忠還掌大都督府事八月
辛巳詔凡致仕官復其家終身無所與九月己亥沐英
大破西番禽其部長三副使十一月甲午沐英班師封
仇成藍玉等十二人爲侯庚申大寧平十二月汪廣洋
以欺罔貶廣南賜死徵天下博學老成之士至京師是

年占城瓜哇暹羅日本安南高麗入貢高麗貢黃金百斤白金萬兩以不如約却之

十三年春正月戊戌左丞相胡惟庸謀反及其黨御史大夫陳寧中丞涂節等伏誅癸卯大祀天地于南郊罷中書省廢丞相等官更定六部官秩改大都督府爲中左右前後五軍都督府乙巳命南北更調用人二月壬戌朔詔舉聰明正直孝弟力田賢良方正文學術數之士發丹符驗天下金穀之數戊辰詔文武官年六十以上者聽致仕給以誥敕三月壬辰減蘇松嘉湖重賦十二壬寅燕王棣之國北平壬子沐英襲元將托和齊

于額齊訥禽之盡降其衆夏四月己丑命羣臣各舉所知五月甲午雷震謹身殿乙未大赦丙申釋在京及臨濠屯田輸作者己亥免天下田租吏以過誤罷者還其職壬寅都督濮英進兵赤斤站獲故元幽王額琳沁及其部曲而還是月罷御史臺命從征士卒老疾者許以子代老而無子及寡婦有司資遣還六月丙寅雷震奉天門避正殿省愆丁卯罷王府工役丁丑置諫院官秋八月命天下學校師生日給廩膳九月辛卯命景川侯曹震滎陽侯楊璟永城侯薛顯屯田北平乙巳天壽節始受羣臣朝賀賜宴于謹身殿丙午置四府官告於太

廟以儒士王本杜佑龔敦杜敦趙民望吳源爲春夏官
是月詔陝西衛軍以三分之二屯田安置翰林學士承
旨宋濂于茂州道卒冬十一月乙未徐達還丙午元平
章旺扎勒布哈鼐爾布哈侵永平指揮劉廣戰沒千戶
王輅擊敗之禽旺扎勒布哈十二月天下府州縣所舉
士至者八百六十餘人授官有差命南雄侯趙庸鎮廣
東討陽春蠻是年琉球日本安南占城真臘瓜哇入貢
日本以無表却之

十四年春正月戊子命徐達爲征虜大將軍湯和傅友
德爲左右副將軍帥師征鼐爾布哈命新授官者各舉

所知乙未大祀天地于南郊壬子罷天下歲造兵器癸丑命公侯子弟入國學丙辰詔求隱逸是月命郡縣編賦役籍刑官讞獄議請得旨送四輔諫院官給事中覆核無疑始奏行之著爲令二月己卯增置各道左右布政使庚辰覈天下官田三月丙戌大赦丁亥復置各道提刑按察使司先是吳元年置按察使十三年罷至是復置辛丑頒五經四書于北方學校夏四月庚午徐達率諸將出塞至北黃河擊破元兵獲全寧四部以歸五月五溪蠻叛江夏侯周德興討平之秋八月丙子詔求明經老成之士有司禮送京師庚辰河決原武祥符中

牟辛巳徐達還九月壬午朔命傅友德爲征南將軍藍
玉沐英爲左右副將軍帥師征雲南徐達鎮北平丙午
周德興移師討施州蠻平之冬十月壬子朔日有食之
癸丑命法司錄囚會翰林院給事中及春坊官會議平
允以聞甲寅免應天太平廣德鎮江寧國田租癸亥分
遣御史錄囚己卯延安侯唐勝宗帥師討浙東山寇平
之十一月壬午命安吉侯陸仲亨鎮成都己亥置大理
寺先是吳元年置大理司尋罷後三年置磨勘司尋亦
罷至是置寺定員品庚戌趙庸討廣州海寇大破之十
二月丁巳命翰林春坊官考駁諸司章奏戊辰傅友德

明史卷三

本紀第三

總裁官總理事務 經筵講官保兼太子保親殿學士兼實都戶部尚書事架級張廷壽等奉

敕修

太祖三

十五年春正月辛巳宴羣臣于謹身殿始用九奏樂景川侯曹震定遠侯王弼下威楚路壬午元曲靖宣慰司及中慶澂江武定諸路俱降雲南平己丑詔大辟囚皆減死論乙未大祀天地于南郊庚戌命天下朝覲官各舉所知一人二月壬子河決河南命駙馬都尉李祺振之甲寅以雲南平詔天下閏月癸卯蓋玉沐英克大理

分兵徇鶴慶麗江金齒俱下三月丙辰改國子學爲國
子監庚午河決朝邑夏四月甲申遷元梁王巴咱爾幹
爾密及威順王子巴拜等家屬於耽羅丙戌詔天下通
祀孔子壬辰免畿內浙江江西河南山東稅糧四月乙
未置錦衣衛丙申殺大理寺卿李仕魯帝崇信沙門高
其官秩頗寄耳目仕魯諫不聽遂乞骸骨納笏帝前帝
大怒命武士摔搏之立死五月乙丑太學成釋奠于先
師孔子丙午廣平府吏王允道請開磁州鐵冶帝曰朕
聞王者使天下無遺賢不聞無遺利今軍器不乏而民
業已定無益於國且重擾民杖之流嶺南丁丑遣行人

訪經明行修之士秋七月乙卯河決滎澤陽武辛酉罷
四輔官乙亥傅友德沐英擊烏撒蠻大敗之八月丁丑
復設科取士三年一行爲定制丙戌皇后馬氏崩己丑
命延安侯唐勝宗長興侯耿炳文屯田陝西丁酉以秀
才會泰爲戶部尚書辛丑命徵至秀才分六科試用九
月己酉吏部以經明行修之士鄭韜等三千七百餘人
入見令舉所知復遣使徵之賜韜等鈔尋各授布政使
參政等官有差庚午葬孝慈皇后於孝陵選僧侍諸王
冬十月丙子置都察院丙申錄囚甲辰徐達還是月廣
東羣盜平詔趙庸班師十一月戊午置殿閣大學士以

邵質吳伯宗宋訥吳沉爲之十二月辛卯振北平被災
屯田士卒已亥命永城侯薛顯理山西軍務是年瓜哇
琉球烏斯藏占城入貢

十六年春正月乙卯大祀天地於南郊戊午命徐達鎮
北平二月丙申初命天下學校歲貢士於京師三月甲
辰召征南師還沐英留鎮雲南丙寅復鳳陽臨淮二縣
民繇賦世世無所與夏五月庚申免畿內各府田租六
月辛卯免畿內十二州縣養馬戶田租一年滁州免二
年秋七月分遣御史錄囚八月壬申朔日有食之九月
癸亥命申國公鄧鎮爲征南將軍討龍泉山寇平之冬

十月丁丑召徐達等還十二月甲午刑部尚書開濟受賂縱囚殺獄官滅口與侍郎王希哲等並坐誅是年琉球占城西番打箭爐暹羅須文達那入貢

十七年春正月丁未大祀天地于南郊戊申命徐達鎮北平壬戌命湯和巡視沿海諸城防倭三月戊戌朔頒科舉取士式曹國公李文忠卒甲子大赦天下夏四月壬午論平雲南功進封傅友德潁國公陳桓等侯者四人
大賚將士庚寅收陣亡遺骸增築國子學舍五月丙寅涼州指揮宋晟討西番于額齊納敗之秋七月戊戌禁內官預外事敕諸司毋通內官監文移癸丑詔百官

迎養父母者官給舟車丁巳免畿內今年田租之半庚申錄囚壬戌盱眙人獻天書誅之八月丙寅河決開封壬申決杞縣遣官塞之己丑蠲河南諸省逋賦冬十月丙子河南北平大水分遣駙馬都尉李祺等振之閏月癸丑詔天下刑獄刑部都察院詳議大理寺覆讞奏決是月召徐達還十二月壬子蠲雲南逋賦是年琉球暹羅安南占城入貢

十八年春正月辛未大祀天地于南郊癸酉朝覲官分五等考績黜陟有差二月甲辰以久陰雨雷雹詔臣民極言得失己未魏國公徐達卒三月壬戌賜丁顯等進

士及第出身有差詔中外官父母歿任所者有司給舟
車歸其喪著爲令乙亥免畿內今年田租命天下郡縣
瘞暴骨丙子初選進士爲翰林院承敕監六科庶吉士
己丑戶部侍郎郭桓坐盜官糧誅夏四月丁酉吏部尚
書余燠牒祭酒宋訥致仕坐專擅誅丙辰思州蠻叛命
湯和爲征虜將軍周德興爲副將軍帥師從楚王禎討
之六月戊申定外官三年一朝著爲令秋七月甲戌封
王禡爲高麗國王庚戌五開蠻叛八月庚戌命馮勝傅
友德藍玉備邊北平是月振河南水災冬十月己丑頒
大誥于天下癸卯詔馮勝還甲辰詔曰孟子傳道有功

名教歷年既久子孫甚微近有以罪輸作者豈禮先賢之意哉其加意詢訪凡聖賢後裔輸作者皆免之是月楚王楨信國公湯和討平五開蠻十一月乙亥蠲河南山東北平田租十二月丙午詔有司舉孝廉癸丑麓川平緬宣慰使思倫發反都督馮誠敗績千戶王昇死之是年高麗琉球安南暹羅入貢

十九年春正月辛酉振大名及江浦水災甲子大祀天地于南郊是月征蠻師還二月丙申耕藉田癸丑振河南饑夏四月甲辰詔贖河南饑民所鬻子女六月甲辰詔有司存問高年貧民年八十以上月給米五斗酒三

斗肉五斤九十以上歲加帛一匹絮一斤有田產者罷
給米應天鳳陽富民年八十以上賜爵社士九十以上
鄉士天下富民八十以上里士九十以上社士皆與縣
官均禮復其家鰥寡孤獨不能自存者歲給米六石士
卒戰傷除其籍賜復三年將校陣亡其子世襲加一秩
巖穴之士以禮聘遣丁未振青州及鄭州饑秋七月癸
未詔舉經明行修練達時務之士年六十以上者置翰
林備顧問六十以下於六部布按二司用之八月甲辰
命皇太子修泗州盱眙祖陵葬德祖以下帝后冕服九
月庚申屯田雲南冬十月壬申命官軍已亡子女幼或

父母老者皆給全俸著爲令十二月癸未朔日有食之
是月命宋國公馮勝分兵防邊發北平山東山西河南
民運糧于大寧是年高麗琉球暹羅占城安南入貢

二十年春正月癸丑命馮勝爲征虜大將軍傅友德藍
玉副之率師征納克楚焚錦衣衛刑具以繫囚付刑部
甲子大祀天地于南郊二月壬午閱武乙未耕藉田三
月辛亥馮勝率師出松亭關城大寧寬河會州富峪夏
四月戊子江夏侯周德興築福建瀕海城練兵防倭六
月庚子臨江侯陳鏞從征失道戰歿癸卯馮勝兵踰金
山丁未納克楚降閏月庚申師還次金山都督濮英殿

軍遇納克楚潰軍伏發死之秋八月己酉收馮勝將軍
印召還藍玉攝軍事命景川侯曹震屯田雲南品甸九
月戊寅封納克楚海西侯癸未置大寧都指揮使司丁
酉鄭國公常茂坐激散納克楚降軍安置龍州丁未命
藍玉爲征虜大將軍延安侯唐勝宗武安侯郭英副之
北征沙漠是月城西寧冬十月戊申封朱壽爲舳臚侯
張赫爲航海侯是月馮勝罷歸鳳陽奉朝請十一月壬
午命普定侯陳桓靖寧侯葉昇屯田定邊姚安畢節諸
衛己丑湯和還凡築寧海臨山等五十九城十二月壬
申振登萊饑是年琉球安南高麗占城眞臘朶甘烏斯

藏入貢

二十一年春正月辛巳麓川蠻思倫發入寇馬龍他郎
甸都督甯正擊敗之辛卯大祀天地于南郊甲午振青
州饑逮治有司匿不以聞者三月乙亥賜任亨泰等進
士及第出身有差丙戌振東昌饑甲辰沐英討思倫發
敗之夏四月丙辰藍玉襲破元嗣君于捕魚兒海獲其
次子迪保努及妃主王公以下數萬人而還五月甲戌
朔日有食之六月甲辰信國公湯和歸鳳陽甲子命傅
友德爲征南將軍沐英陳桓爲左右副將軍帥師討東
川叛蠻秋七月戊寅安置迪保努于琉球八月癸丑徙

澤潞民無業者墾河南北田賜鈔備農具復三年丁卯
藍玉師還大賚北征將士戊辰封孫恪爲全寧侯是月
御製八諭飭武臣九月丙戌秦晉燕周楚齊湘魯潭九
王來朝癸巳越州蠻阿資叛沐英會傅友德討之冬十
月丁未東川蠻平十二月壬戌進封藍玉涼國公是年
高麗占城琉球暹羅真臘賽瑪爾堪安南人貢詔安南
三歲一朝象犀之屬毋獻安南黎季犛弑其主煒
二十二年春正月丙戌改大宗正院曰宗人府以秦王
棧爲宗人令晉王櫛燕王棣爲左右宗正周王橚楚王
楨爲左右宗人丁亥大祀天地于南郊乙未傅友德破

阿資于普安二月己未命藍玉練兵四川壬戌禁武臣預民事癸亥湖廣千戶夏得忠結九溪蠻作亂靖寧侯葉昇討平之得忠伏誅是月阿資降三月庚午命傅友德帥諸將分屯四川湖廣防西南蠻夏四月己亥徙江南民田淮南賜鈔備農具復三年癸丑命魏國公徐允恭開國公常昇等練兵湖廣甲寅徙元降王于耽羅是月遣御史按山東官匿災不奏者五月辛卯置泰寧朶顏福餘三衛于烏梁海秋七月傅友德等還八月乙卯詔天下舉高年有德識時務者是月更定大明律九月丙寅朔日有食之冬十一月丙寅命宣德侯金鎮等練

兵湖廣己卯思倫發入貢謝罪麓川平十二月甲辰周
王橚私居鳳陽坐擅棄其國遷雲南尋罷徙留居京師
命定遠侯王弼等練兵山西河南陝西是年高麗安南
占城暹羅真臘入貢元伊遜岱爾弒其主特古思特穆
爾而立琨特穆爾高麗廢其主禍又廢其主昌安南黎
季犛復弒其主日焜

二十三年春正月丁卯命晉王櫛燕王棣帥師征元丞
相耀珠太尉鼐爾布哈征虜前將軍穎國公傅友德等
皆聽節制己卯大祀天地于南郊庚辰貴州蠻叛延安
侯唐勝宗討平之乙酉命齊王榑帥師從燕王棣北征

贛州賊爲亂命東川侯胡海充總兵官普定侯陳桓靖
寧侯葉昇爲副將討平之命唐勝宗督貴州各衛屯田
二月戊申藍玉討平西番叛蠻丙辰耕藉田癸亥河決
歸德發諸軍民塞之三月癸巳燕王棣師次伊都耀珠
等降夏四月丙申吉安侯陸仲亨等坐胡惟庸黨下獄
潭王梓自焚死梓妃都督於顯女顯坐胡惟庸黨誅梓
疑懼與妃皆自焚閏月甲戌詔百官期服毋奔喪丙子
藍玉平施南忠建叛蠻五月甲午遣諸公侯還里賜金
幣有差乙卯追論胡惟庸黨賜太師韓國公李善長死
陸仲亨等皆坐誅作昭示姦黨錄布告天下六月乙丑

藍玉遣鳳翔侯張龍平都勻散毛諸蠻庚寅授耆民有才德知典故者官秋七月壬辰河決開封振之癸巳崇明海門風雨海溢遣官振之發民二十五萬築隄八月壬申詔母以吏卒充選舉藍玉還是月振河南北平山東水災九月庚寅朔日有食之冬十月己卯振湖廣饑十一月癸丑免山東被災田租十二月癸亥令殊死以下囚輸粟北邊自贖壬申罷天下歲織文綺是年默拉哈瑪爾高麗占城真臘琉球暹羅入貢

二十四年春正月癸卯大祀天地于南郊戊申以潁國公傅友德爲征虜將軍定遠侯王弼武定侯郭英副之

備北平邊丁巳免山東田租二月壬申耕藉田三月戊子朔日有食之命魏國公徐輝祖曹國公李景隆涼國公藍玉等備邊陝西乙未命靖寧侯葉昇練兵甘肅丁酉賜許觀等進士及第出身有差夏四月辛未封皇子榘爲慶王權寧王榘岷王榘谷王松韓王模藩王楹安王桎唐王棟郢王欒伊王癸未燕王棣督傅友德諸將出塞敗敵而還五月戊戌命漢衛谷慶寧岷六王練兵臨清六月己未詔廷臣參考歷代禮制更定冠服居室器用制度甲子久旱錄囚秋七月庚子徙富民實京師辛丑免畿內官田租之半八月乙卯秦王棧以怨望召

還京師乙丑命皇太子巡撫陝西乙亥都督僉事劉眞
宋晟討哈瑪爾敗之九月乙酉遣使諭西域是月倭寇
雷州百戶李玉鎮撫陶鼎戰死冬十月丁巳免北平河
間被水田租十一月甲午五開蠻叛都督僉事茅鼎討
平之庚戌皇太子還京師晉王櫛來朝辛亥振河南水
災十二月庚午周王橚復國辛巳阿資復叛都督僉事
何福討降之是年天下郡縣賦役黃冊成計戶千六十
八萬四千四百三十五丁五千六百七十七萬四千五
百六十一琉球暹羅巴什伯里賽瑪爾堪入貢以占城
篡逆却之

二十五年春正月戊子周王橐來朝庚寅河決陽武發
軍民塞之免被水田租乙未大祀天地于南郊何福討
都勻畢節諸蠻平之辛丑宥死罪囚輸粟塞下壬寅晉
王桐燕王棣楚王楨湘王柏來朝二月戊午召曹國公
李景隆等還京師命靖寧侯葉昇等練兵于河南及臨
鞏甘涼延慶都督茅鼎等平五開蠻丙寅耕藉田庚辰
詔天下衛所軍以十之七屯田三月癸未命馮勝等十
四人分理陝西山西河南諸衛軍務庚寅改封豫王桂
爲代王漢王模爲肅王衛王植爲遼王夏四月壬子命
涼國公藍玉征罕東癸丑建昌衛指揮伊嚕特穆爾叛

指揮魯毅敗之丙子皇太子標薨戊寅命都督聶緯徐
司馬瞿能討伊嚕特穆爾俟藍玉還並聽節制五月辛
巳藍玉至罕東寇遁遂趨建昌己丑振陳州武原水災
六月丁卯西平侯沐英卒于雲南秋七月庚辰秦王檄
復國癸未指揮瞿能敗伊嚕特穆爾于雙狼寨丁未改
詹事院爲詹事府八月己未江夏侯周德興坐帷薄不
修誅丁卯命馮勝傅友德帥開國公常昇等分行山西
籍民爲軍屯田于大同東勝立十六衛甲戌給公侯歲
祿歸賜田于官丙子靖寧侯葉昇坐胡惟庸黨誅九月
庚寅立皇孫允炆爲皇太孫高麗李成桂幽其主瑤而

自立以國人表來請命詔聽之更其國號曰朝鮮冬十月乙亥沐春襲封西平侯鎮雲南十一月甲午藍玉禽伊嚕特穆爾誅之召玉還十二月甲戌以宋國公馮勝穎國公傅友德等兼東宮師保官閏月戊戌命馮勝爲總兵官傅友德副之練兵山西河南兼領屯衛是年琉球中山山南高麗哈瑪爾入貢

二十六年春正月戊申免天下耆民來朝辛酉大祀天地於南郊二月丁丑命晉王櫛統山西河南軍出塞召馮勝傅友德常昇王弼等還乙酉蜀王椿來朝涼國公藍玉以謀反并鶴慶侯張翼普定侯陳桓景川侯曹震

舳艫侯朱壽東莞伯何榮吏部尚書詹徽等皆坐誅己
丑頒逆臣錄于天下庚寅耕藉田三月辛亥命代王桂
率護衛兵出塞聽晉王節制長興侯耿炳文練兵陝西
丙辰命馮勝傅友德備邊山西北平其屬衛將校悉聽
晉王燕王節制庚申詔二王軍務大者始以聞壬戌會
寧侯張溫坐藍玉黨誅夏四月乙亥孝感饑遣使乘傳
發倉貸之詔自今遇歲饑先貸後聞著爲令戊子周王
橚來朝庚寅早詔羣臣直言得失省獄囚丙申以安南
擅廢立絕其朝貢秋七月甲辰朔日有食之戊申選秀
才張宗濬等隨詹事府官分直文華殿侍皇太孫八月

秦晉燕周齊五王來朝九月癸丑代肅遼慶寧五王來朝赦胡惟庸藍玉餘黨冬十月丙申擢國子監生六十四人爲布政使等官十二月頒永鑑錄于諸王是年琉球瓜哇暹羅入貢

二十七年春正月乙卯大祀天地于南郊辛酉命李景隆爲平羌將軍鎮甘肅發天下倉穀貸貧民三月庚子賜張信等進士及第出身有差辛丑命魏國公徐輝祖安陸侯吳傑備倭浙江庚戌詔課民樹桑棗木棉甲子詔工部以四方底平收藏甲兵示不復用秋八月甲戌命吳傑及永定侯張銓率致仕武臣備倭廣東乙亥遣

國子監生分行天下督吏民修水利丙戌階文軍亂命
都督寧正爲平羌將軍討之九月命徐輝祖節制陝西
沿邊諸軍冬十一月乙丑賜潁國公傅友德死藍玉旣
誅定遠侯王弼與友德語皆自危帝聞之賜死阿資復
叛西平侯沐春擊敗之十二月乙亥賜定遠侯王弼死
是年烏斯藏琉球緬朶甘瓜哇賽瑪爾堪朝鮮入貢安
南來貢却之

二十八年春正月丙午階文寇平命寧正以兵從秦王
檄征洮州叛番丁未大祀天地于南郊甲子西平侯沐
春擒斬阿資越州平是月周王橚晉王櫛率河南山西

諸衛軍出塞築城屯田燕王棣帥總兵官周興出遼東
塞二月丁卯賜宋國公馮勝死己丑諭戶部編民百戶
爲里婚姻死喪疾病患難里中富者助財貧者助力春
秋耕穫通力合作以教民睦六月壬申詔諸土司皆立
儒學辛巳周興等自開原追敵至布達密城不及而還
己丑御奉天門諭羣臣曰朕起兵至今四十餘年灼見
情僞懲創奸頑或法外用刑本非常典後嗣止循律與
大誥不許用黥刺劓劓閹割之刑臣下敢以請者寘重
典又曰朕罷丞相設府部都察院分理庶政事權歸於
朝廷嗣君不許復立丞相臣下敢以請者寘重典皇親

惟謀逆不赦餘罪宗親會議取上裁法司祇許舉奏毋得擅逮勒諸典章永爲遵守秋八月丁卯命都督楊文爲征南將軍指揮韓觀都督僉事宋晟副之討龍州土官趙宗壽戊辰信國公湯和卒辛巳趙宗壽伏罪來朝楊文移兵討奉議南丹叛蠻九月丁酉免畿內山東秋糧庚戌頒皇明祖訓條章于中外後世有言更祖制者以奸臣論十一月乙亥奉議南丹蠻悉平十二月壬辰詔河南山東桑棗及二十七年後新墾田毋徵稅是年朝鮮琉球暹羅入貢

二十九年春正月壬申大祀天地于南郊二月癸卯征

虜前將軍胡冕討郴桂蠻平之辛亥命燕王帥師巡大
寧周世子有燉帥師巡北平關隘三月辛酉楚王楨湘
王柏來朝甲子燕王敗敵于察察爾山又追敗之于烏
蘭哈達城而還秋八月丁未免應天太平五府田租九
月乙亥召致仕武臣二千五百餘人入朝大賚之各進
秩一級是年琉球安南朝鮮烏斯藏入貢

三十年春正月丙辰命耿炳文爲征西將軍郭英副之
巡西北邊丙寅大祀天地于南郊丁卯置行太僕寺於
山西北平陝西甘肅遼東掌馬政己巳命左都督楊文
屯田遼東己卯改太常光祿二司爲寺改儀禮司爲鴻

臚寺是月沔縣盜起詔耿炳文討之二月庚寅水西蠻
叛命都督僉事顧成爲征南將軍討平之三月癸丑賜
陳郊等進士及第出身有差庚辰古州蠻叛龍里千戶
吳得鎮撫井孚戰死夏四月己亥命都指揮齊讓爲平
羌將軍討之壬寅水西蠻平五月壬子朔日有食之乙
卯命楚王楨湘王柏帥師討古州蠻六月辛巳策試禮
部下第舉人賜韓克忠等進士出身有差己酉駙馬都
尉歐陽倫坐販私茶賜死秋八月丁亥河決開封甲午
命李景隆爲征虜大將軍練兵河南九月庚戌漢沔寇
平戊辰麓川平緬土酋刀幹孟逐其宣慰使思倫發以

叛乙亥命都督楊文爲征虜大將軍代齊讓冬十月戊子停遼東海運辛卯命耿炳文練兵陝西乙未重建國子監先師廟成十一月癸酉命沐春爲征虜前將軍都督何福等副之討刀幹孟是年琉球占城朝鮮暹羅烏斯藏尼博囉入貢

三十一年春正月壬戌大祀天地于南郊乙丑遣使之山東河南課耕二月乙酉倭寇寧海指揮陶鐸擊敗之辛丑古州蠻平召楊文還甲辰都督僉事徐凱討平麼些蠻夏四月庚辰廷臣以朝鮮屢生釁隙請討不許五月丁未沐春擊刀幹孟大敗之甲寅帝不豫戊午命都

督楊文從燕王棣武定侯郭英從遼王植備禦開平俱
聽燕王節制閏月癸未帝疾大漸乙酉崩于西宮年七
十有一詔曰朕膺天命三十有一年憂危積心日勤不
怠務有益于民顧起自寒微無古人之博知好善惡惡
不及遠矣今得萬物自然之理其奚哀念之有皇太孫
允炆仁明孝友天下歸心宜登大位內外文武臣僚同
心輔政以安吾民喪祭儀物毋用金玉孝陵山川因其
故無改作天下臣民哭臨三日皆釋服毋妨嫁娶諸王
臨國中毋至京師諸不在令中者推此令從事辛卯葬
孝陵諡曰高皇帝廟號太祖永樂元年諡神聖文武欽

明啓運俊德成功統天大孝高皇帝嘉靖十七年增諡
開天行道肇紀立極大聖至神仁文義武俊德成功高
皇帝帝天授智勇統一方夏當肇造之初沉幾觀變次
第經略綽有成算嘗與諸臣論取天下之略曰朕遭時
喪亂初起鄉土本圖自全及渡江以來觀羣雄所爲徒
爲生民之患而張士誠陳友諒尤爲巨蠹士誠恃富友
諒恃強朕獨無所恃惟不嗜殺人布信義行節儉與卿
等同心共濟初與二寇相持士誠尤逼近或謂宜先擊
之朕以友諒志驕士誠器小志驕則好生事器小則無
遠圖故先攻友諒鄱陽之役士誠卒不能出姑蘇一步

以爲之援向使先攻士誠浙西負固堅守友諒必空國
而來吾腹背受敵矣二寇旣除北定中原所以先山東
次河洛止潼關之兵不遽取秦隴者蓋庫庫特穆爾李
思齊張思道皆百戰之餘未肯遽下急之則併力一隅
猝未易定故出其不意反旆而北燕都旣舉然後西征
張李望絕勢窮不戰而克然庫庫特穆爾猶力抗不屈
向令未下燕都驟與角力勝負未可知也帝之雄才大
略料敵制勝率類此故能勘定禍亂以有天下語云天
道後起者勝豈偶然哉

贊曰太祖以聰明神武之資抱濟世安民之志乘時應

運豪傑景從戡亂摧強十五載而成帝業崛起布衣奄
奠海宇西漢以後所未有也懲元政廢弛治尚嚴峻而
能禮致耆儒考禮定樂昭揭經義尊崇正學加恩勝國
澄清吏治修人紀崇風教正後宮名義內治肅清禁宦
豎不得干政五府六部官職相維置衛屯田兵食俱足
武定禍亂文致太平太祖實身兼之至于雅尚志節聽
蔡子英北歸晚歲憂民益切嘗以一歲開支河暨塘堰
數萬以利農桑備旱潦用此子孫承業二百餘年士重
名義閭閻充實至今苗裔蒙澤尚如東樓白馬世承先
祀有以哉

明史卷四

本紀第四

總教官總理事務經筵講官少保兼太子太保保和殿大學士兼管吏部戶部尚書事加六級張廷玉等奉

敕修

恭閱帝

恭閱惠皇帝諱允炆太祖孫懿文太子第二子也母妃呂氏帝生穎慧好學性至孝年十四侍懿文太子疾晝夜不暫離更二年太子薨居喪毀瘠太祖撫之曰而誠純孝顧不念我乎洪武二十五年九月立爲皇太孫二十九年重定諸王見東宮儀制朝見後於內殿行家人禮以諸王皆尊屬也初太祖命太子省決章奏太子性

仁厚於刑獄多所減省至是以命太孫太孫亦復佐以寬大嘗請於太祖遍考禮經參之歷朝刑法改定洪武律畸重者七十三條天下莫不頌德焉三十一年閏五月太祖崩辛卯卽皇帝位大赦天下以明年爲建文元年是日葬高皇帝於孝陵詔行三年喪羣臣請以日易月帝曰朕非效古人亮陰不言也朝則麻冕裳退則齊衰杖經食則餽粥郊社宗廟如常禮遂命定儀以進丙申詔文臣五品以上及州縣官各舉所知非其人者坐之六月省并州縣革冗員戶部侍郎卓敬請徙封燕王棣於南昌不聽以兵部侍郎齊泰爲本部尚書翰林院

修撰黃子澄爲太常卿同參軍國事召漢中府教授方
孝孺爲翰林院侍講秋七月詔行寬政赦有罪蠲逋賦
八月廢周王橚橚子有燭告橚謀不軌命李景隆執之
廢爲庶人徙雲南勅魏國公徐輝祖練兵山東以備燕
詔興州營州開平諸衛軍全家在伍者免一人天下衛
所軍單丁者放爲民九月雲南總兵官西平侯沐春卒
於軍詔左副將何福代領其衆冬十一月以工部侍郎
張昺爲北平布政使謝貴張信掌北平都指揮使伺察
燕陰事詔求直言舉山林才德之士十二月癸卯何福
破斬刀幹孟麓川平是月賜天下明年田租之半釋黥

軍及囚徒還鄉里是年暹羅占城入貢

建文元年春正月癸酉受朝不舉樂庚辰大祀天地於南郊奉太祖配修太祖實錄二月追尊皇考曰孝康皇帝廟號興宗妣常氏曰孝康皇后尊母妃呂氏曰皇太后冊妃馬氏爲皇后封弟允熲爲吳王允燧衡王允熙徐王立皇長子文奎爲皇太子詔告天下舉遺賢賜民高年米肉絮帛鰥寡孤獨廢疾者官爲牧養重農桑興學校考察官吏振罹災貧民旌節孝瘞暴骨蠲荒田租衛所軍戶絕者除勿勾詔諸王母得節制文武吏士更定內外大小官制三月釋奠於先師孔子罷天下諸司

不急務勅都督宋忠徐凱耿獻帥兵屯開平臨清山海關調北平永清二衛軍于彰德順德命刑部尚書暴昭戶部侍郎夏原吉等二十四人充採訪使分巡天下甲午京師地震求直言御史尹昌隆言奸臣專政陰盛陽微是以地震忤執政貶福寧知縣尋召還夏四月或告湘王柏齊王樽代玉桂反柏懼自焚死廢樽桂爲庶人遣燕王世子高熾及其弟高煦高燧還北平北平按察僉事湯宗上變告按察使陳瑛受燕王金通密謀逮瑛廣西安置六月西平侯沐晟奏岷王榷過惡廢爲庶人徙漳州己酉燕山護衛百戶倪諒上變燕旗校於諒等

伏誅詔讓燕王棣逮王府官僚棣稱疾都指揮張信叛
附於燕秋七月癸酉燕王棣誘殺布政使張昺都指揮
使謝貴遂舉兵反長史葛誠護衛指揮盧振伴讀余逢
辰死之叅政郭資副使墨麟僉事呂震等降於燕棣上
書請入清君側指揮馬宣走薊州俞瑱走居庸宋忠趨
北平聞變退保懷來通州遵化密雲相繼降燕丙子燕
兵陷薊州馬宣戰死己卯燕兵陷居庸關甲申陷懷來
宋忠俞瑱被執死都指揮彭聚孫泰力戰死永平指揮
郭亮等叛降燕壬辰谷王穗自宣府奔京師命長興侯
耿炳文爲征虜大將軍駙馬都尉李堅都督寧忠爲左

右副將軍帥師討燕祭告天地宗廟社稷削燕屬籍詔曰邦家不造骨肉周親屢謀僭逆去年周庶人櫛僭爲不軌辭連燕齊湘三王朕以親親故止正櫛罪今年齊王搏謀逆又與棣柏同謀柏伏罪自焚死搏已廢爲庶人朕以棣於親最近未忍窮治其事今乃稱兵構亂圖危宗社獲罪天地祖宗義不容赦是用簡發大兵往致厥罰咨爾中外臣民軍士各懷忠守義與國同心掃茲逆氛永安至治尋命安陸侯吳傑江陰侯吳高都督耿璘都指揮盛庸潘忠楊松顧成徐凱李友陳暉平安分道並進置平燕布政使司於真定以尚書暴昭掌司事

八月己酉耿炳文兵次真定徐凱屯河間潘忠楊松屯
鄭州壬子燕兵陷雄縣潘忠楊松戰於月漾橋被執鄭
州陷壬戌耿炳文及燕兵戰於滹沱河北敗績李堅寧
忠顧成被執炳文退保真定燕兵攻之不克引去召遼
王植寧王權歸京師植渡海還朝改封荊州權不至詔
削護衛丁卯以曹國公李景隆爲征虜大將軍代耿炳
文九月戊辰吳高耿獻楊文帥遼東兵圍永平戊寅景
隆兵次河間燕兵援永平吳高退保山海關冬十月燕
兵自劉家口間道襲陷大寧守將朱鑑死之總兵官劉
真都督陳亨援大寧亨叛降燕真由海道遁還京師燕

執寧上權奪其衆及朶顏三衛卒歸北平辛亥李景隆圍北平燕兵還救十一月辛未李景隆及燕兵戰於鄭村壩敗績奔德州諸軍盡潰燕王棣再上書於朝帝爲罷齊泰黃子澄官仍留京師

二年春正月丙寅朔詔天下來朝官勿賀丁卯釋奠於先師孔子二月燕兵陷蔚州進攻大同李景隆自德州赴援燕兵還北平保定知府雒僉叛降燕甲子復以都察院爲御史府均浙江田賦詔曰國家有惟正之供江浙賦獨重而蘇松官田悉準私稅用懲一時豈可爲定則今悉與減免畝母踰一斗蘇松人仍得官戶部三月

丙寅朔日有食之賜胡廣等進士及第出身有差夏四月李景隆會武定侯郭英安陸侯吳傑等進次白溝河己未及燕兵戰都督平安瞿能敗之棣以三騎遁明日復戰又敗之日晡景隆敗績都督瞿能越嶲侯俞淵指揮滕聚等皆戰死景隆奔德州五月辛未奔濟南燕兵陷德州遂攻濟南庚辰景隆敗績於城下南走參政鐵鉉都督盛庸悉力禦之六月己酉遣尚寶丞李得成諭燕罷兵棣不奉詔得成叛降燕秋八月癸巳承天門災詔求直言改謹身殿爲正心殿午門爲端門端門爲應門承天門爲臯門前門爲路門戊午盛庸鐵鉉擊敗燕

兵濟南圍解復德州九月詔錄洪武中功臣罪廢者後
辛未封盛庸歷城侯擢鐵鉉山東布政使參贊軍務尋
進兵部尚書以庸爲平燕將軍都督陳暉平安副之庸
屯德州平安及吳傑屯定州徐凱屯滄州冬十月詔李
景隆還赦不誅戊午燕兵襲滄州徐凱被執十二月甲
午燕兵犯濟寧薄東昌乙卯盛庸擊敗之斬其將張玉
丙辰復戰又敗之燕兵走館陶庸軍勢大振檄諸屯軍
合擊燕絕其歸路

三年春正月辛酉朔凝命神寶成告天地宗廟御奉天
殿受朝賀乙丑吳傑平安邀擊燕兵於深州不利辛未

大祀天地於南郊丁丑享太廟告東昌捷復齊泰黃子澄官三月辛巳盛庸敗燕兵於夾河斬其將譚淵再戰不利都指揮莊得楚智等力戰死壬午復戰敗績庸走德州辛亥都督何福援德州癸巳竄齊泰黃子澄密令募兵於外諭燕罷兵閏月己亥吳傑平安及燕戰於藁城敗績還保真定燕兵掠真定順德廣平大名棣上書請召還諸將息兵遣大理少卿薛昂報之是月禮制成頒行天下五月甲寅盛庸以兵扼燕餉道不克棣復遣使上書下其使於獄六月壬申燕將李遠寇沛縣焚糧艘壬午都督袁宇邀擊之敗績秋七月己丑燕兵掠彰

德丁酉平安自真定攻北平壬寅大同守將房昭帥兵
由紫荆關趨保定駐易州西水寨九月甲辰平安及燕
將劉江戰於北平敗績還保真定冬十月丁巳真保諸
將遣兵援房昭及燕王戰于齊眉山敗績十一月壬辰
遼東總兵官楊文攻永平及劉江戰於昌黎敗績己亥
平安敗燕將李彬於楊村十二月癸亥燕兵焚真定軍
儲詔中官奉使侵暴吏民者所在有司繫治是月命駙
馬都尉梅殷鎮淮安太祖實錄成

四年春正月甲申召故周王橚於蒙化居之京師燕兵
連陷東阿東平汶上兗州濟陽東平吏目鄭華濟陽教

諭王省皆死之甲申魏國公徐輝祖帥師援山東燕兵陷蕭沛沛縣知縣須伯瑋主簿唐子清典史黃謙蕭縣知縣鄭恕死之癸丑薄徐州二月甲寅都督何福及陳暉平安軍濟寧盛庸軍淮上己卯更定品官勲階三月燕兵攻宿州平安追及於肥河斬其將王真遇伏敗績宿州陷夏四月丁卯何福平安敗燕兵於小河斬其將陳文甲戊徐輝祖等敗燕兵於齊眉山斬其將李斌燕兵懼謀北歸會帝聞訛言謂燕兵已北召輝祖還何福軍亦孤庚辰諸將及燕兵大戰於靈壁敗績指揮宋瑄力戰死陳暉平安禮部侍郎陳性善大理寺卿彭與明

皆被執五月癸未楊文帥遼東兵赴濟南潰於直沽己丑盛庸軍潰於淮上燕兵渡淮下泗州盱眙兵部主事樊士信死之趨揚州指揮王禮等叛降燕御史王彬指揮崇剛死之辛丑燕兵至六合諸軍迎戰敗績壬寅詔天下勤王遣御史大夫練子寧侍郎黃觀修撰王叔英分道徵兵召齊泰黃子澄還蘇州知府姚善寧波知府王璉徽州知府陳彥回樂平知縣張彥方前永清典史周縉各起兵入衛甲辰下詔罪己遣慶成郡主如燕師議割地罷兵六月癸丑盛庸帥舟師敗燕兵於浦子口復戰不利都督僉事陳瑄以舟師叛附於燕乙卯燕兵

渡江盛庸戰於高資港敗績戊午鎮江守將童俊叛降
燕庚申燕兵至龍潭辛酉命諸王分守都城遣李景隆
及兵部尚書茹瑺都督王佐如燕軍申前約壬戌復遣
谷王穗安王楹往皆不聽甲子遣使齎蠟書四出促勤
王兵乙丑燕兵犯金川門左都督徐增壽謀內應伏誅
谷王穗及李景隆叛納燕兵御史連楹叩馬欲刺棣被
殺都城陷宮中火起帝不知所終棣遣中使出后屍於
火詭云帝屍越八日壬申用學士王景言備禮葬之或
云帝由地道出亡正統五年有僧自雲南至廣西詭稱
建文皇帝思恩知府岑瑛聞于朝按問乃鈞州人楊行

祥年已九十餘下獄閱四月死同謀僧十二人皆戍遼東自後滇黔巴蜀間相傳有帝爲僧時往來跡正德萬歷崇禎間諸臣請續封帝後及加廟謚皆下部議不果行

大清乾隆元年

詔廷臣集議追謚曰恭閔惠皇帝

贊曰惠帝天資仁厚踐阼之初親賢好學召用方孝孺等典章制度銳意復古嘗因病晏朝尹昌隆進諫卽深自引咎宣其疏于中外又除軍衛單丁減蘇松重賦皆惠民之大者乃革命而後紀年復稱洪武嗣是子孫臣

庶以紀載爲嫌草野傳疑不無訛謬更越

聖朝得經論定尊名壹惠君德用彰懿哉

明史卷五

本紀第五

總裁憲理事務 經筵講官 保兼李太保和殿大學士兼詹事府詹事 如終讓廷玉等奉 敕修

成祖一

成祖啓天弘道高明肇運聖武神功純仁至孝文皇帝
諱棣太祖第四子也母孝慈高皇后洪武三年封燕王
十三年之藩北平王貌奇偉美髭髯智勇有大略能推
誠任人二十三年同晉王討鼐爾布哈晉王怯不敢進
王倍道趨伊都山獲其全部而還太祖大喜是後屢帥
諸將出征並令王節制沿邊士馬王威名大振三十一

年五月命都督楊文從王備邊開平閏五月太祖崩皇
太孫卽位遺詔諸王臨國中毋得至京師時諸王以尊
屬擁重兵多不法帝納齊秦黃子澄謀欲因事以次削
除之憚燕王強未發乃先廢周王橚欲以牽引燕於是
告訐四起湘代齊岷皆以罪廢王內自危佯狂稱疾秦
子澄密勸帝除王帝未決建文元年夏六月燕山百戶
倪諒告變逮官校於諒周鐸等伏誅下詔讓王并遣中
官逮王府僚王遂稱疾篤都指揮使謝貴布政使張昺
以兵守王宮都指揮張信叛附于王以情輸之王密與
僧道衍謀令指揮張玉朱能潛納勇士八百人入府守

衛秋七月癸酉匿壯士端禮門給貴昷入殺之遂奪九
門上書天子指秦子澄爲奸臣并援祖訓朝無正臣內
有奸惡則親王訓兵待命天子密詔諸王統領鎮兵討
平之書旣發遂舉兵自署官屬號其師曰靖難拔居庸
關破懷來執宋忠取密雲克遵化降永平二旬衆至數
萬八月天子以耿炳文爲大將軍帥師致討己酉師至
真定前鋒抵雄縣壬子王夜渡白溝河圍雄拔其城屠
之甲寅都指揮潘忠楊松自鄭州來援伏兵擒之遂據
鄭州還駐白溝大將軍部校張保來降言大將軍軍三
十萬先至者十三萬半營滹沱河南半營河北王懼與

北軍戰南軍且乘之也乃縱保歸俾揚言王帥兵且至
誘其軍盡北渡河壬戌王至真定與張玉譚淵等夾擊
炳文軍大破之獲其副將李堅甯忠及都督顧成等斬
首三萬級進圍真定二日不下乃引去天子聞炳文敗
遣曹國公李景隆代領其軍九月戊辰江陰侯吳高以
遼東兵圍永平戊寅景隆合兵五十萬進營河間王語
諸將曰景隆色厲而中餒聞我在必不敢遽來不若往
援永平以致其師吳高怯不任戰我至必走然後還擊
景隆堅城在前大軍在後必成擒矣丙戌燕師援永平
壬辰吳高聞王至果走追擊敗之遂北趨大寧壬寅以

計入其城居七日挾寧王權拔大寧之衆及朶顏三衛
卒俱南乙卯至會州始立五軍張玉將中軍鄭亨何壽
副之朱能將左軍朱榮李濬副之李彬將右軍徐理孟
善副之徐忠將前軍陳文吳達副之房寬將後軍和允
中毛整副之丁巳入松亭關景隆聞王征大寧果引軍
圍北平築壘九門世子堅守不戰十一月庚午王次孤
山邏騎還報曰白河流澌不可渡王禱於神至則冰合
乃濟師景隆遣都督陳暉偵敵道左出王軍後王分軍
還擊之暉衆爭渡河冰忽解溺死無算辛未與景隆戰
於鄭村壩王以精騎先破其七營諸將繼至景隆大敗

奔還乙亥復上書自訴請去太子澄帝爲罷二人以謝
燕十二月景隆調兵德州期以明年春大舉王乃謀侵
大同曰攻大同彼必赴救大同苦寒南軍脆弱且不戰
疲矣庚申降廣昌二年春正月丙寅克蔚州二月癸丑
至大同景隆果由紫荆關來援王已旋軍居庸景隆兵
多凍餒死者不見敵而還夏四月景隆進兵河間與郭
英吳傑平安期會白溝河乙卯王營蘇家橋己未遇平
安兵河側王以百騎前佯却誘安陣動乘之安敗走遂
薄景隆軍戰不利暝收軍王以三騎殿夜迷失道下馬
伏地視河流乃辨東西渡河去庚申復戰景隆橫陣數

十里破燕後軍王自帥精騎橫擊之斬瞿能父子令邱福衝中堅不得人王盪其左景隆兵乃繞出王後大戰良久飛矢雨注王三易馬矢盡揮劍劍折走登堤佯引鞭若招後繼者景隆疑有伏不敢前高煦救至乃解時南軍益集燕將士皆失色王奮然曰吾不進敵不退有戰耳乃復以勁卒突出其背夾攻之會旋風起折景隆旗王乘風縱火奮擊斬首數萬溺死者十餘萬人郭英潰而西景隆潰而南盡喪其所賜璽書斧鉞走德州五月癸酉王入德州景隆走濟南庚辰攻濟南景隆大敗南走叅政鐵鉉都督盛庸等堅守不下王堰水灌之鉉

乃佯伏地請降預懸鐵板城門上候王入擊之別設伏斷城外橋王至板驟下王驚走伏發橋倉卒不可斷遂得逸王憤甚築長圍晝夜攻之秋八月戊申鉉與庸乘夜出兵掩擊王大敗解圍還北平九月盛庸代李景隆將復取德州與吳傑平安徐凱相犄角以困北平時徐凱方城滄州王佯出兵攻遼東至通州循河而南渡直沽晝夜兼行冬十月戊午襲執徐凱破其城夜坑降卒三千人遂渡河過德州盛庸遣兵來襲擊敗之十一月壬申至臨清十二月丁酉襲破盛庸將孫霖於滑口乙卯及庸戰於東昌庸以火器勁弩殲王兵會平安軍至

合圍數重王大敗潰圍以免亡數萬人張玉戰死三年
春正月辛酉敗吳傑平安於威縣乙丑又敗之於深州
遂還北平二月乙巳復帥師南下三月辛巳與盛庸遇
於夾河譚淵戰死朱能張武殊死鬪庸軍少却會日暮
各斂兵入營王以十餘騎逼庸營野宿及明起視已在
圍中乃從容引馬鳴角穿營而去諸將以天子有詔毋
使負殺叔父名倉卒相顧愕眙不敢發一矢是日復戰
自辰至未兩軍相勝負東北風忽起塵埃蔽天燕兵大
呼乘風縱擊庸大敗走德州吳傑平安自真定引軍與
庸會未至八十里聞敗引還王以計誘之傑安出兵襲

王閏月戊戌遇於藁城己亥與戰大風拔木傑安敗走
追至真定城下癸丑至大名聞齊泰黃子澄已罷上書
請召還吳傑平安盛庸兵天子使大理少卿薛嵩來報
諭王釋甲王不奉詔夏五月傑安庸分兵斷燕餉道王
遣指揮武勝上書詰其故天子怒下勝獄王遂遣李遠
略沛縣焚糧舟萬計秋七月己丑掠彰德丙申降林縣
平安乘虛搗北平王遣劉江迎戰安敗走房昭屯易州
西水寨攻保定王引兵圍之冬十月丁巳都指揮花英
援昭敗之峨眉山下斬首萬級昭棄寨走己卯還北平
十一月乙巳王自爲文祭南北陣亡將士當是時王稱

兵三年矣親戰陣冒矢石以身先士卒常乘勝逐北然亦屢瀕於危所克城邑兵去旋復爲朝廷守僅據有北平保定永平三府而已無何中官被黜者來奔具言京師空虛可取狀王乃慨然曰頻年用兵何時已乎要當臨江一決不復返顧矣十二月丙寅復出師四年春正月乙未由館陶渡河癸丑徇徐州三月壬辰平安以四萬騎躡王軍王設伏淝河大敗之丙午遣譚清斷徐州餉道還至大店爲鐵鉉軍所圍王引兵馳援清突圍出合擊敗之夏四月丙寅王營小河爲橋以濟平安趨爭橋陳文戰死平安軍橋南王軍橋北相持數日平安轉

戰遇王於北坂王幾爲安槩所及番騎王騏躍入陣掖
王逸去王曰南軍饑更一二日餉至猝未易破乃令千
餘人守橋夜半渡河而南繞出安軍後比旦安始覺適
徐輝祖來會甲戌大戰齊眉山下勝負相當明日安拔
衆遁王引兵追及安深塹自固時燕連失大將淮土盛
暑蒸濕諸將請休軍小河東就麥觀釁王曰今敵持久
饑疲遮其餉道可以坐困奈何北渡懈將士心乃下令
欲渡河者左諸將爭趨左王怒曰任公等所之乃無敢
復言丁丑何福等營靈壁燕遮其餉道平安分兵六萬
人護之己卯王帥精銳橫擊斷其軍爲二何福空壁來

援王軍少却高煦伏兵起福敗走辛巳進薄其壘破之
生擒平安陳暉等三十七人何福走免五月己丑下泗
州謁祖陵賜父老牛酒辛卯盛庸扼淮南岸朱能邱福
潛濟襲走之遂克盱眙癸巳王集諸將議所向或言宜
取鳳陽或言先取淮安王曰鳳陽樓櫓完淮安多積粟
攻之未易下不若乘勝直趨揚州指儀真則淮鳳自震
我耀兵江上京師孤危必有內變諸將皆曰善己亥徇
揚州駐軍江北天子遣慶成郡主至軍中許割地以和
不聽六月癸丑江防都督僉事陳瑄以舟師叛附於王
甲寅祭大江乙卯自瓜州渡盛庸以海艘迎戰敗績戊

午下鎮江庚申次龍潭辛酉天子復遣大臣議割地諸王繼至皆不聽乙丑至金川門谷王穗李景隆等開門納王都城遂陷是日王分命諸將守城及皇城還駐龍江下令撫安軍民大索齊泰黃子澄方孝孺等五十餘人榜其姓名曰奸臣丙寅諸王羣臣上表勸進己巳王謁孝陵羣臣備法駕奉寶璽迎呼萬歲王升輦詣奉天殿卽皇帝位復周王橚齊王榑爵丁丑召方孝孺草登極詔孝孺投筆哭且罵帝大怒泰子澄亦抗辯不屈遂與孝孺同磔於市皆夷其族坐黨死者數百人戊寅遷興宗孝康皇帝主於陵園仍稱懿文太子秋七月壬午

朔大祀天地於南郊奉太祖配詔今年以洪武三十五年爲紀明年爲永樂元年建文中更改成法一復舊制山東北平河南被兵州縣復徭役三年未被兵者與鳳陽淮安徐滁揚三州蠲租一年餘天下州縣悉蠲今年田租之半癸未召前北平按察使陳瑛爲左副都御史盡復建文朝廢斥者官甲申復官制癸巳改封吳王允熲廣澤王衡王允燧懷恩王徐王允熙敷惠王隨母妃呂氏居懿文太子陵園癸卯命江陰侯吳高督河南陝西兵備撫安軍民甲辰命尙書嚴震直王鈍府尹薛正言等巡視山西山東河南陝西八月壬子命侍讀解縉

編修黃淮入直文淵閣尋命侍讀胡廣修撰楊榮編修
楊士奇檢討金幼孜胡儼同入直並預機務執兵部尙
書鐵鉉至不屈殺之命左軍都督劉真鎮遼東丁巳分
遣御史察天下利弊戊午命都督何福爲征虜將軍鎮
寧夏節制陝西行都司都督同知韓觀練兵江西節制
廣東福建甲子命西平侯沐晟鎮雲南是月御史大夫
景清懷利刃早朝搜得礫于市九月甲申論功封邱福
淇國公朱能成國公張武等侯者十四人徐祥等伯者
十四人甲午定功臣死罪減祿例乙未徙山西民無田
者實北平賜之鈔復五年韓觀爲征南將軍鎮廣西冬

十月壬申徙封谷王穗於長沙丁巳命北平州縣棄官
避兵者朱寧等二百一十九人入粟免死戊興州己未
修太祖實錄丙寅命鎮遠侯顧成鎮貴州甲戌詔從征
將士掠民間子女者還其家十一月壬辰立妃徐氏爲
皇后廢廣澤王允熈懷恩王允燧爲庶人俱錮鳳陽十
二月癸丑蠲被兵州縣明年夏稅

楊士奇等請命于帝曰朕聞人言朕不肖子孫必不肖也朕聞之
言曰朕至不肖殺之命在軍都督劉景賢曰陛下已公
是則使天下利歸于公矣命景賢何如景賢曰臣死
三日癸丑醜縣兵圍縣門番夏赫何如景賢曰臣死
皇氣窺窺羈王俞繼謝恩王俞繼漁漁人具醜鳳鳴十
傑士赫只問于文香數其案十一日壬辰直波射丸雷
劫天肺寶殺丙寅命繼表謝德無與實州甲如臨於孤
發其香未寧筆之百仁手扶人天粟我我必與州日未
市且壬申戰捷谷王赫然吳也王曰命非乎世練棄官

明史卷六 本紀第六

總裁官總理事務 經筵講官 祿兼李太保保和殿大學士兼管吏部戶部尚書事 張廷玉等奉

敕修

成祖二

永樂元年春正月己卯朔御奉天殿受朝賀宴羣臣及屬國使乙酉享太廟辛卯大祀天地於南郊復周王橚齊王榑代王桂岷王榘舊封以北平爲北京癸巳命保定侯孟善鎮遼東丁酉以宋晟爲平羌將軍鎮甘肅二月庚戌設北京留守行後軍都督府行部國子監改北平曰順天府乙卯遣御史分巡天下爲定制己未徙封

寧王權于南昌貽書郭勒齊汗許其遣使通好癸亥耕
藉田乙丑遣使徵尙師哈里瑪於烏斯藏己巳振北京
六府饑辛未命法司五日一引奏罪囚壬申蹙戰地暴
骨甲戌命高陽王高煦備邊開平三月庚辰命江陰侯
吳高鎮大同壬午改北平行都司爲大寧都司徒保定
始以大寧地畀烏梁海戊子命平江伯陳瑄都督僉事
宣信充總兵官督海運餉遼東北京歲以爲常甲午振
直隸北京山東河南饑夏四月丁未朔安南胡奩乞襲
陳氏封爵遣使察實以聞己酉命戶部尙書夏原吉治
蘇松嘉湖水患辛未岷王榷縱恣不法降其官屬甲戌

命襄城伯李濬鎮江西五月丁丑除天下荒田未墾者
額稅癸未宥死罪以下遞減一等庚寅捕山東蝗丁酉
河南蝗免今年夏稅是月再論功封駙馬都尉袁容等
三人爲侯陳亨子懋等六人爲伯六月壬子召代王桂
不至削其護衛癸丑遣給事中御史分行天下撫安軍
民有司奸貪者逮治丁巳改上高皇帝高皇后尊諡戊
辰命武安侯鄭亨鎮宣府秋七月庚寅復貽書郭勒齊
八月己巳發流罪以下墾北京田甲戌徙直隸蘇州等
十郡浙江等九省富民實北京九月癸未命寶源局鑄
農器給山東被兵窮民庚寅初遣中官馬彬使瓜哇諸

國乙未歷城侯盛庸坐怨望削爵尋自殺庚子削岷王
榘護衛冬十一月乙亥朔頒歷於朝鮮諸國著爲令壬
辰罷遣浚河民夫甲午北京地震乙未命六科辦事官
言事丙申韓觀討柳州山賊平之閏月丁卯封胡奎爲
安南國王是年始命內臣出鎮及監京營軍朝鮮入貢
者六自是歲時貢賀爲常琉球中山山北山南暹羅占
城瓜哇西王日本刺泥安南入貢

二年春正月乙巳復命夏原吉治水蘇松乙卯大祀天
地於南郊丁巳定屯田賞罰例己巳召世子高熾及高
陽王高煦還京師三月乙巳賜曾棨等進士及第出身

有差己酉始選進士爲翰林院庶吉士庚戌吏部請罪
千戶違制薦士者帝曰馬周不因常何進乎果才授之
官否則罷之可耳戊辰改封敷惠王允熙甌寧王奉懿
文太子祀夏四月辛未朔置東宮官屬壬申以僧道衍
爲太子少師復其姓姚賜名廣孝甲戌立子高熾爲皇
太子封高煦漢王高燧趙王壬午封汪應祖爲琉球國
山南王五月壬寅命豐城侯李彬鎮廣東清遠伯王友
充總兵官率舟師巡海六月丁亥汰冗官辛卯振松江
嘉興蘇州湖州饑甲午封哈密恩克特穆爾爲忠順王
秋七月壬戌鄱陽民進書毀先賢杖之毀其書丙寅振

江西湖廣水災八月丁酉故安南國王陳日燿弟天平
來奔九月丙午周王橚來朝獻騶虞百官請賀帝曰瑞
應依德而至騶虞若果爲祥在朕更當修省丁卯徙山
西民萬戶實北京命自今御史巡行察吏毋得撫拾人
言賢否皆其實蹟以聞冬十月丁丑河決開封乙酉蒲
城河津黃河清是月長興侯耿炳文以僭妄不道籍其
家炳文自殺十一月甲辰御奉天門錄囚癸丑京師及
濟南開封地震敕羣臣修省戊午蠲蘇松嘉湖杭水災
田租十二月壬辰同州韓城黃河清是月李景隆以居
家不道削爵錮私第籍其家是年占城巴什伯里琉球

再
山北山南瓜哇真臘入貢暹羅日本琉球中山入貢者

三年春正月乙巳韃靼索和爾內屬庚戌大祀天地於南郊甲寅遣使責諭安南庚申復免順天永平保定田租二年二月己巳行部尙書雜僉以言事涉怨誹誅癸未趙王高燧居守北京三月甲寅免湖廣被水田租夏四月壬申除直隸浙江湖廣四川廣東江西福建河南戶絕田租三萬五千餘頃六月己卯中官鄭和帥舟師使西洋諸國庚辰命中官山壽等帥兵出雲州覘敵甲申命夏原吉等振蘇松嘉湖饑免天下農民戶口食鹽

鈔庚寅胡奩謝罪請迎陳天平歸國秋九月丁酉蠲蘇
松嘉湖水災田租凡三百三十八萬石丁巳徙山西民
萬戶實北京冬十月乙丑殺駙馬都尉梅殷丁卯齊王
樽有罪三賜書戒之戊子頒祖訓於諸王十二月戊辰
沐晟討八百降之庚辰都督僉事黃中呂毅以兵納陳
天平于安南是年蘇門荅刺滿刺加古里淳泥來貢封
其長爲王日本貢馬并俘獲倭寇爲邊患者瓜哇東西
占城碟里日羅夏治合貓里火州回回入貢暹羅琉球
山南山北入貢者再琉球中山入貢者三

四年春正月丁未大祀天地于南郊丙辰初御午朝令

羣臣奏事得從容陳論三月辛卯朔釋奠於先師孔子
甲午設遼東開原廣寧馬市乙巳賜林環等進士及第
出身有差丙午胡奩襲殺陳天平於芹站前大理卿薛
崑死之黃中等引兵還夏四月己卯遣使購遺書五月
丁酉振常州廬州安慶饑庚戌齊王搏驕縱不法削官
屬護衛留之京師六月己未朔日當食陰雲不見禮官
請表賀不許丙寅南陽獻瑞麥諭禮部曰比郡縣屢奏
祥瑞獨此爲豐年之兆命薦之宗廟秋七月辛卯命朱
能爲征夷將軍沐晟張輔副之帥師分道討安南兵部
尙書劉儁叅贊軍務行部尙書黃福大理卿陳洽督餉

詔曰安南皆朕赤子惟黎季犛父子首惡必誅他脅從者釋之罪人旣得立陳氏子孫賢者毋養亂毋玩寇毋毀廬墓毋害禾稼毋攘財貨掠子女毋殺降有一於此雖功不宥乙巳申誹謗之禁閏月壬戌詔以明年五月建北京宮殿分遣大臣採木於四川湖廣江西浙江山西八月丁酉詔通政司凡上書奏民事者雖小必以聞癸丑齊王樽廢爲庶人九月戊辰振蘇松常杭嘉湖流民復業者十二萬餘戶冬十月戊子成國公朱能卒於軍張輔代領其衆乙未克隘留關庚子沐晟率師會於白鶴十一月己巳甘露降孝陵松柏醴泉出神樂觀薦

之太廟賜百官辛巳戶部人材高文雅上書言事授以
官十二月辛卯赦天下殊死以下張輔大破安南兵於
嘉林江丙申拔多邦城丁酉克其東都癸卯克西都賊
遁入海辛亥甌寧王允熙邸第火王薨是年暹羅占城
于闐淳泥日本琉球中山山南娑羅入貢瓜哇東西真
臘人貢者再巴什伯里入貢者三琉球進闈人還之回
回結雅渠進玉椀却之
五年春正月丁卯大祀天地於南郊己巳張輔大敗安
南兵於木丸江二月庚寅出翰林學士解縉爲廣西叅
議三月丁巳封尙師哈里瑪爲大寶法王辛巳張輔大

破安南兵於富良江夏四月辛卯皇長孫瞻基出閣就
學己酉振順天河間保定饑五月甲子張輔擒黎季犛
黎蒼獻京師安南平河南饑逮治匿災有司勅都察院
凡災傷不以實聞者罪之六月癸未以安南平詔天下
置交阯布政司己丑山陽民丁珏訐其鄉人誹謗擢爲
刑科給事中甲午詔自永樂二年六月後犯罪去官者
悉宥之乙未張輔移師會韓觀討潯柳叛蠻癸卯命張
輔訪交阯人才禮遣赴京師秋七月乙卯皇后崩丁卯
河溢河南八月乙酉命左都督何福鎮甘肅庚子錄囚
雜犯死罪減等論戍流以下釋之九月壬子鄭和俘海

賊陳祖義至京師斬之乙卯御奉天門受安南俘大賚
將士冬十月溥柳蠻平十一月乙丑修永樂大典成是
年琉球中山山南娑羅日本巴什伯里阿魯賽瑪爾堪
蘇門答刺滿刺加小葛蘭入貢

六年春正月丁巳岷王棟復有罪罷其官屬辛酉大祀
天地於南郊二月丁未除北京永樂五年以前逋賦免
諸色課程三年三月癸丑命寧陽伯陳懋鎮寧夏乙卯
除河南山東山西永樂五年以前逋賦夏四月丙申始
命雲南鄉試五月壬戌夜京師地震六月庚辰詔罷北
京諸司不急之務及買辦以甦民困流民來歸者復三

年丁亥張輔沐晟班師還京秋七月癸丑論平交阯功
進封張輔英國公沐晟黔國公王友清遠侯封都督僉
事柳升安遠伯餘爵賞有差八月乙酉交阯簡定反命
沐晟爲征夷將軍討之劉儁仍參贊軍務九月己酉命
刑部疏滯獄癸亥鄭和復使西洋冬十一月丁巳錄囚十
二月丁酉沐晟及簡定戰於生厥江敗績劉儁及都督
僉事呂毅叅政劉昱死之是月柳升陳瑄李彬等率舟
師分道沿海捕倭是年郭勒齊爲其下所弑立布尼雅
錫哩爲汗浣泥國王來朝衛拉特占城于闐暹羅賽瑪
爾堪榜葛刺馮加施蘭日本瓜哇琉球中山山南入貢

七年春正月辛亥命戶部嚴邊關茶禁癸丑賜百官上
元節假十日著爲令乙卯大祀天地於南郊二月乙亥
遣使於巡狩所經郡縣存問高年八十以三賜酒肉九
十加帛丙子徵致仕知府劉彥才等九十二人分署府
州縣辛巳以北巡告天地宗廟社稷壬午發京師皇太
子監國命張輔王友率師討簡定丁亥忠誠伯茹瑄坐
不謁谷王下獄死戊子謁鳳陽皇陵三月甲辰次東平
州望祭泰山辛亥次景州望祭恒山乙卯帝覽奏見平
安名日平保兒尙在耶安懼自殺壬戌至北京癸亥大
賚官吏軍民丙寅詔起兵時將士及北京効力人民雜

犯死罪咸宥之充軍者官復職軍民還籍伍壬申柳升
敗倭於青州海中敕還師夏四月癸酉朔皇太子攝享
太廟壬午海寇犯欽州副總兵李珪遣將擊敗之閏月
戊申命皇太子所決庶務六科月一彙奏丙辰諭行在
法司重罪必五覆奏五月己卯營山陵於昌平封其山
曰天壽乙未封衛拉特瑪哈木特爲順寧王太平爲賢
義王巴圖博囉爲安樂王六月壬寅察北巡郡縣長吏
擢汶上知縣史誠祖治行第一下易州同知張騰於獄
辛亥給事中郭驥使布尼雅錫哩爲所殺丁卯斥御史
洪秉等四人詔自今御史勿用吏員秋七月癸酉命淇

國公邱福爲征虜大將軍武成侯王聰同安侯火真副
之靖安侯王忠安平侯李遠爲左右叅將討布尼雅錫
哩八月甲寅邱福敗績於臚胸河福及聰真忠遠皆戰
死庚申張輔敗賊於鹹子關九月庚午朔日有食之張
輔敗賊於太平海口甲戌贈北征死事李遠莒國公王
聰漳國公遂決意親征丙子命武安侯鄭亨率師巡邊
壬午命成安侯郭亮備禦開平冬十月丁未削邱福封
爵徙其家於海南十一月戊寅張輔獲簡定於美良送
京師誅之十二月庚戌賜濟寧至良鄉民頻年遞運者
田租一年乙丑召張輔還是年滿刺加哈喇賽瑪爾堪

火州古里占城蘇門答刺琉球中山山南入貢暹羅榜
葛刺入貢者再

八年春正月辛未召寧陽侯陳懋隨征漠北己卯皇太子攝祀天地於南郊癸巳免去年揚州淮安鳳陽陳州水災田租贖軍民所鬻子女乙未張輔班師仍留沐晟等鎮之二月辛丑以北征詔天下命戶部尚書夏原吉輔皇長孫瞻基留守北京乙巳皇太子錄囚奏貫雜犯死罪以下從之丁未發北京癸亥遣祭所過名山大川乙丑大閱三月丁卯命清遠侯王友督中軍安遠伯柳升副之寧遠侯何福武安侯鄭亨督左右哨寧陽侯陳

懋廣恩伯劉才督左右掖都督劉江督前哨甲戌次鳴
鑾戌乙亥誓師夏四月庚申次威虜鎮以橐駝所載水
給衛士視軍士皆食始進膳五月丁卯更名臚胸河曰
飲馬甲戌聞布尼雅錫哩西奔遂渡飲馬河追之己卯
及於鄂諾河大敗之布尼雅錫哩以七騎遁丙戌還次
飲馬河詔移師征阿嚕台丁亥回回哈喇瑪雅殺都指
揮劉秉謙據肅州衛以叛千戶朱迪等討平之六月甲
辰阿嚕台僞降命諸將嚴陣以待果悉衆來犯帝自將
精騎迎擊大敗之追北百餘里丁未又敗之己酉班師
秋七月丁卯次開平帝在軍念士卒艱苦每蔬食是日

宴賚始復常膳命西寧侯宋琥鎮甘肅辛巳振安慶徽
州鳳陽鎮江饑壬午至北京御奉天殿受朝賀甲午論
功行賞有差八月壬寅進封柳升安遠侯乙卯都御史
陳瑛劾寧遠侯何福怨望福懼自殺庚申河溢開封九
月己巳幸天壽山冬十月丁酉發北京是月倭寇福州
十一月甲戌至京師十二月癸巳阿嚕台遣使貢馬戊
午陳季擴乞降以爲交趾右布政使季擴不受命是年
碩尼堪寇黃河東岸寧夏都指揮王倬敗沒淳泥呂宋
馮嘉施蘭蘇門答刺榜葛刺人貢占城貢象琉球山南
瓜哇暹羅貢馬琉球中山入貢者三

九年春正月甲戌大祀天地於南郊丙子命柳升鎮寧
夏已卯命張輔爲征虜副將軍會沐晟討交阯丙戌命
豐城侯李彬平江伯陳瑄率浙江福建兵捕海寇二月
辛亥帝始聞陳瑛諸不法狀下獄死丙辰詔赦交阯丁
巳倭陷昌化千戶所己未工部尙書宋禮開會通河三
月甲子賜蕭時中等進士及第出身有差壬午浚祥符
縣黃河故道戊子劉江鎮遼東夏六月乙巳鄭和還自
西洋俘錫蘭山國王亞烈苦奈兒以獻釋之是月交阯
右叅議解縉坐請鑿贛江下獄秋七月丙子張輔敗賊
於月常江九月戊寅諭法司凡死罪必五覆奏壬午命

屯田軍以公事妨農務者免徵子粒著爲令冬十月乙未寬北京謫徙軍民賦役癸卯封哈密推勒特穆爾爲忠義王乙巳復修太祖實錄十一月戊午蠲陝西逋賦癸亥張輔敗賊於生厥江丁卯立皇長孫瞻基爲皇太孫壬申命韓觀爲征夷副將軍改鎮交趾都指揮葛森鎮廣西丙子敕法司決遣罪囚毋淹滯丁丑築浙江仁和海寧海鹽捍潮隄是月遣使督瘞戰場暴骨十二月壬辰敕宥福餘朶顏泰寧三衛罪令入貢閏月丁巳命府部諸臣陳軍民利弊是年浙江湖廣河南順天揚州水河南陝西疫遣使振之滿刺加王來朝瓜哇榜葛刺

古里柯枝蘇門答刺阿魯彭亨急蘭丹南巫里暹羅入
貢阿嚕台來貢馬巴什伯里獻文豹琉球中山入貢者

三

十年春正月己丑命入覲官千五百餘人各陳民瘼不
言者罪之言有不當勿問丁酉大祀天地於南郊癸丑
振平陽饑逮治布政使及郡縣官不奏聞者二月辛酉
蠲山西河南逋賦庚辰削遼王植護衛三月丁亥命豐
城侯李彬討甘肅叛寇巴爾斯多羅岱戊子賜馬鐸等
進士及第出身有差甲辰免北京水災租稅夏六月甲
戌諭戶部凡郡縣有司及朝使目擊民艱不言者悉逮

治秋七月癸卯禁中官干預有司政事八月癸丑張輔
大破交趾賊於神投海已未敕邊將自長安嶺迤西迄
洗馬林築石垣深濠塹冬十月戊辰獵城南武岡十一
月壬午涼州酋婁達袞叛走赤斤蒙古命右庶子楊榮
詣甘肅經略之丙申鄭和復使西洋十二月錦衣衛指
揮紀綱誣奏浙江按察使周新殺之是年淳泥占城暹
羅滿刺加榜葛刺蘇門答刺南淳利琉球山南入貢
十一年春正月辛巳朔日有食之詔罷朝賀宴會壬午
諭通政使禮科給事中凡朝覲官境內災傷不以聞爲
他人所奏者罪之辛卯大祀天地於南郊辛丑以豐城

侯李彬鎮甘肅召宋琥還二月辛亥始設貴州布政司
癸亥令北京民戶分養孳生馬著爲令甲子幸北京皇
太孫從尙書蹇義學士黃淮諭德楊士奇洗馬楊溥輔
皇太子監國乙丑發京師命給事中御史所過存問高
年賜酒肉及帛丙寅葬仁孝皇后於長陵辛未次鳳陽
謁皇陵夏四月己酉至北京五月丁亥定死罪情輕者
納鈔贖罪例壬辰赤斤蒙古擒婁達袞來獻丁未曹縣
獻騶虞禮官請賀不許秋七月戊寅封阿嚕台爲和寧
王八月甲子北京地震乙丑命鎮遠侯顧成討思州靖
州叛苗九月壬午詔自今郡縣官每歲春行視境內蝗

蝻害稼卽捕絕之不如詔者二司并罪冬十月丙寅以
璽書命皇太子錄囚十一月戊寅以野蠶繭爲衾命皇
太子薦太廟壬午衛拉特瑪哈木特兵渡飲馬河阿魯
台告警命邊將嚴守備甲申命寧陽侯陳懋都督譚青
馬聚朱崇巡寧夏大同山西邊簡練士馬尋命陝西山
西及潼關等五衛兵駐宣府中都遼東河南三都指揮
使司及武平等四衛兵會北京乙巳命應城伯孫巖備
開平十二月壬子張輔沐晟大敗交趾賊於愛子江是
年嗎哈木特弒其主布尼雅錫哩立塔爾巴爲汗巴什
伯里滿刺加占城瓜哇西王入貢琉球中山入貢者四

琉球山南入貢者再